

# NÜXĪRAÜXÜ GA POPERA GA CORĪTIUCŪĀX GA YAXŌGÜXÜTANÜWA NAMUXÜ GA PAURU

*Pauru rü nüxü narümoxē ga yema yaxōgüxü ga Corĭtiuarü ĩānewa yexmagüxü*

1-2 Pa Chaueneēgü i Corĭtiucŭāxgüx, choma i Pauru nixĭ i Tupana yaxuxü norü ngüchaxümaã na Ngechuchu ya Cristu norü puracüwa choxü namuxücèx. Rü choma rü namaã i taeneē i Chótene nixĭ i pexü tarümōxēgüxü rü pexcèx tanaxümatüxü i ñãã popera. Pa Chaueneēgü ya Tupanaärü Ixĭgüxex, pema rü marü Tupanapēxewa pixüüne yerü Ngechuchu ya Cristu marü pexü nixüünexēē. Rü Tupana rü marü pexü nade na norü duüxügü pixĭgüxcèx wüxigu namaã i guxüma i ngēma duüxügü i guxüwama tórü Cori ya Ngechuchu ya Cristuxü icuèxüügüxü. Rü nüma ya Ngechuchu ya tórü Cori ixĭcü, rü ngēma duüxügüarü Cori ta nixĭ.

<sup>3</sup> Rü chanaxwèxe ya Tanatü ya Tupana rü tórü Cori ya Ngechuchu ya Cristu norü ngechaxügagu poraãcü pexü narüngüxēē rü pexü nataãēxēē.

*Tupana tüxü narüngüxēē erü Cristuarü duüxügü tixĭgü*

<sup>4</sup> Rü taguma nüxü charüchau na Tupanana moxē pexcèx chaxãxü. Rü moxē nüxna chaxã naxcèx i ngema ngüxēē i Ngechuchu ya Cristugagu Tupana pexna ãmarexü.

5 Yerü Cristugagu Tupana pexna nanamu ga Naãxē i Üünexŭ na pemaxã inaxãúxúcèx. Rŭ pexna nanaxã ga norü ore, rŭ naétü pexŭ nanatauxchaxēē na nüxŭ pecuáxúcèx na ñuxŭ ñaxŭchiga yixŭxŭ.

6 Rŭ yemaãcü yexguma nüxŭ pexĩnüēgu ga yema ore ga Cristuchiga rŭ aixcüma peyaxögü.

7 Rŭ ngēmacèx i ñuxma na ípenanguxēēxŭ na wena táxarü núma naxŭxŭ ya tórü Cori ya Ngechuchu ya Cristu, rŭ Tupana pexna nanaxã i taxŭ i cuèx na taxuŭma pexŭ taxuxúcèx na naxcèx pemaxèxŭ.

8 Rŭ ngēmaãcü tá pexna nadau ya Tupana ñuxmatáta nagú i naãne, rŭ guxŭgutáma pexŭ naporaexēē na aixcüma peyaxögüamaxúcèx rŭ naxcèx pemaxèxúcèx, na taxúema chixexŭmaã pexŭ ixugŭxúcèx i ngēxguma wenaxârü núma naxŭxgu ya tórü Cori ya Ngechuchu ya Cristu.

9 Rŭ Tupana rŭ guxŭguma nayanguxēē i norü uneta. Rŭ nüma nixŭ ga pexŭ nadexŭ na aixcüma Nane ya tórü Cori ya Ngechuchu ya Cristumücügü pixŭgŭxúcèx.

### *Nügü nitoye ga yema yaxögüxŭ*

10 Pa Chaueneēgŭx, tórü Cori ya Ngechuchu ya Cristuégagu pexŭ chacèxŭ na wüxigu pegümaã perüxĩnüèxŭ rŭ tama pegü pitoyexúcèx. Rŭ name nixŭ i aixcüma pegü pengechaŭgŭ rŭ aixcüma wüxigutama perüxĩnüé i peãewa.

11 Pa Chaueneēgŭx, pemaã nüxŭ chixu i ngēma ore, yerü Croétanŭxŭtanüwa nüxŭ chacuáchiga ga pegümaã na penuèxŭ, rŭ tama aixcüma wüxigu na perüxĩnüèxŭ.

12 Rū pemaã nüxũ chixu i ngẽma erũ ñuxre i pema rü ñaperügügü:

“Choma rü Pauruwe charũxũ”, ñaperügügü. Rü togue rü:

“Choma rü Aporuwe charũxũ”, ñaperügügü. Rü togue rü:

“Choma rü Pedruwe charũxũ”, ñaperügügü. Rü togue rü:

“Choma rü Cristuwe charũxũ”, ñaperügügü.

13 ¿Rü ñuxãcü nixĩ i ngẽma? ¿Pexcèx rü Cristu rü marü niyauxye? ¿Éxna pema nüxũ pecuèxgu rü choma i Pauru chiĩxũ ga curuchawa pexcèx chipotaxũ rü chayuxũ? ¿Rü éxna pema nüxũ pecuèxgu rü chauégagu yĩxũ ga ípèbaiũxũ?

14 Rü Tupanana moxẽ chaxã, yerũ taxúema pexũ íchabaiũxẽẽ ga pemax. Rü Crispu rü Gayuxicatama nixĩ ga íchabaiũxẽẽxũ.

15 Rü ngẽmacèx taxucürüwa texé tügü tixu na chauégagu ítabaiexũ.

16 Rü yemãcü aixcüma íchanabaiũxẽẽ ga Estéfanatanũxügü ta, natürü chauxcèx rü taxúema ga togue tüxũ íchabaiũxẽẽ.

17 Yerũ nüma ga Cristu rü tama choxũ namu ga duũxügüxũ na íchabaiũxẽẽxücèx, natürü choxũ namu na duũxügümaã nüxũ chixuxücèx i norü ore i mexũ i tüxũ maxẽxẽẽxũ. Rü nanaxwèxe i tauxchaxũ i oremaã nüxũ chixu i ngẽma ore. Erũ ngẽxguma chi ñoma nüxũ cuèxüchixürüũ nüxũ chixuxgu i ngẽma ore, rü ngürüãchi i duũxügü rü tá chauguama narüxĩnüẽ rü tá nüxũ inayarüngümaẽ na Cristu yĩxũ ga tüxũ maxẽxẽẽcü ga yexguma curuchagu nayuxgux.

*Cristuwa nixĩ ga Tupana inawéxũ ga norü pora rü norü cuèx*

<sup>18</sup> Rũ ngẽma ore na ñuxãcü tórü pecaducèx curuchagu nayuxũ ga Cristu, rü wüxi i natücèxmamare nixĩ naxcèx i ngẽma duũxũgü i poxcuwa ìxũ. Natürü yixema na Tupana tüxũ maxèxèẽxũ, rü nüxũ tacuèx na ngẽma ore rü Tupanaärü pora yĩxũ.

<sup>19</sup> Erü norü ore i ümatüxũwa rü ñanagürü ga Tupana:

“Rü tá ichayanaxoxèẽ i guxũma i norü cuèx i ngẽma duũxũgü i nüxũ cuèxüchigüxũ. Rü tá nüxũ chaxo i ngẽma duũxũgüarü cuèx”, ñanagürü.

<sup>20</sup> Rũ ñuxmax, Pa Chaueneëgüx, ¿Tupanapëxewa rü tacüwa namexũ i ngẽma duũxũgü i poraãcü nüxũ cuèxüchixũ? ¿Rü tacüwa namexũ i ngẽma duũxũgü i Moïché ümatüxũ i mugüwa nguxèëtaegüxũ? ¿Rü tacüwa namexũ i ngẽma duũxũgü i meã nüxũ cuèxgüxũ i ñoma i naãneärü cuáchigagu na yadex-agüxũ? Erü guxũma i ngẽma cuèx i duũxũgü nagu rüxĩnüèxũ rü Tupanacèx rü taxuwama name.

<sup>21</sup> Natürü nüma ya Tupana ya guxũxũma cuácü, rü tama nanaxwèxe na ñoma i naãnecũãx i duũxũgüarü cuágagu na yĩxũ i naxütawa nangugüxũ i nümagü. Natürü nanaxwèxe na ngẽma norü ore i mexügagu na yĩxũ i namaxèxèẽãxũ i ngẽma duũxũgü i yaxõgüxũ woo togücèx rü natücèxmamare yixĩgu i ngẽma ore.

<sup>22</sup> Ngẽma Yudíugü rü nüxũ nadaugüchaũ i cuèxruũgü i Tupanaärü poramaã üxũ. Rũ ngẽma Griégugü rü naxcèx nadaugü i ñoma i naãneärü cuèx.

<sup>23</sup> Natürü ngēma ore i toma nūxū tixuxū, rü Cristu ga curuchawa ipotacūchiga nixī. Rū ngēma ore rü naãēwa nangux i ngema Yudíugū. Rū ngēma duūxūgū i tama Yudíugū ixīgūxūcèx rü wūxi i natücèxmamare nixī.

<sup>24</sup> Natürü ngēma duūxūgū i Tupana dexū i Yudíugū rü ěxna tama Yudíugū ixīgūxū rü ngēma duūxūgūcèx Tupana inanawēx i norü pora rü norü cuèx ga yexguma pecaducèx nayuxgu ga Cristu.

<sup>25</sup> Rū yema Tupana ūxū ga yexguma nayuxgu ga Cristu rü muxūma i duūxūgūcèx rü wūxi i ngēãēmare nixī. Natürü ngēma Tupana nagu rüxīnūxū rü guxūma i ñoma i naãnecūāx i duūxūgūarū cuèxarū yexera nixī. Rū yexguma curuchagu nayuxgu ga Cristu rü muxūma ga duūxūgūcèx rü natura ga Tupana ga yexguma. Natürü yexguma nixī ga inawéāxū ga ñuxācū guxū i duūxūgūarū yexera na naporaxūchixū.

<sup>26</sup> Pa Chaueneēgūx, name nixī i nagu perūxīnūē na ñuxācū Tupana pexū dexū na norü duūxūgū pixīgūxūcèx. Rū noxretama pixīgū na nūxū pecuèxūchixū ega duūxūgū pexū ngugūgu, rü noxretama pixīgū na āēxgacūgū pixīgūxū, rü noxretama pixīgū i ngēma itaarū dīeruāxūtanūxū pixīgūxū. Natürü woo ngēma na pixīgūgu rü Tupana rü pexū nade na norü duūxūgū pixīgūxūcèx.

<sup>27</sup> Rū Tupana nanade ga yema duūxūgū ga togū ga duūxūgū nūxū ixuxgu rü taxuūma icuáxū. Rū yemaācū nanaxū ga Tupana na naxāneēxēēāxūcèx i ngēma duūxūgū i nūxū icuèxūchixū. Rū Tupana nanade ga yema duūxūgū ga togū nūxū ixuxgu rü turaexū. Rū yemaācū

nanaxü ga Tupana na naxãneẽxẽẽãxüçèx i ngẽma duũxüğü i poraexü.

<sup>28</sup> Rũ Tupana nanade ga yema duũxüğü ga togü nüxü oexü, rü ñoma i naãnewa taxuũma ixĩgüxü. Rũ yemaãcü Tupana nanaxãneexẽẽ i ngẽma duũxüğü i ñoma i naanewa norü ngemaxüğümaã nüğü icuèxüüğüxü.

<sup>29</sup> Rũ ngẽmacèx taxucürüwama texé tüğü ticuèxüü i Tupanapẽxewa.

<sup>30</sup> Rũ nümatama ga Tupana nixĩ ga Ngechuchu ya Cristuarü duũxüğüxü pexü yaxĩgüxẽẽxü. Rũ tatanüwa nanamu ga Cristu na nüma tüxna naxããxüçèx i cuèx i aixcüma ixĩxü, rü pecaduwa tüxü ínanguxüxẽẽxüçèx. Rũ nüma ya Cristu nixĩ i tüxü namaxẽxẽẽxü rü tüxü yamexẽẽgüxü na aixcüma ixüünexüçèx napẽxewa ya Tupana.

<sup>31</sup> Rũ ngẽmacèx i Tupanaãrü ore i ümatüxüwa rü ñanagürü:

“Rũ ngẽxguma texé tüğü icuèxüüchaügu rü name nixĩ i tórü Corixü ticuèxüü”,  
ñanagürü.

## 2

### *Cristu ga curuchawa ipotacüchiga*

<sup>1</sup> Pa Chaueneẽgüx, yexguma noxri petanüwa chaxüxgu na pemaã nüxü chixuxüçèx ga Tupanaãrü ore i aixcüma ixĩxü i Cristuchiga, rü tama ñoma nüxü cuèxüchixürüüãcüma pemaã chidexa, rü tama ore ga guxchaxümaã nixĩ ga pemaã nüxü chixuxü.

<sup>2</sup> Yerü yexguma petanüwa chayexmagu, rü Cristuchigaxüĩcatama nixĩ ga pemaã chixuxü. Rũ taxuũma ga řacü ga togu charüxĩnü. Rũ

yemaācū Ngechuchu ya Cristu ga curuchawa ipotacūguxicatama nixī ga charūxīnūxū.

<sup>3</sup> Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacèx poraācū chaxoegaāē rū Tupanapewa chorū muūmaā chidurux.

<sup>4</sup> Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ñoma nūxū cuèxūchixūrūūācūma pemaā nūxū chixu na yemaācū pexū chanangúchaūxēēxū na peyaxōgūxūcèx. Natürū Tupanaāē i Üünexūārū ngūxēēmaā rū Tupanaārū poramaā nixī ga pexū chanangúchaūxēēxū.

<sup>5</sup> Rū yemaācū Tupanaārū poramaā pemaā nūxū chixu ga yema ore na Tupanagagu yīxū na nūxū peyaxōgūxū, rū tama ñoma i naānecūāx i duūxūgūarū cuāgagu na yīxū.

*Tupana rū Naāē i Üünexūwa nūgū tūxū nacuèxēē*

<sup>6</sup> Natürū pemaā nūxū chixu, rū ngēxguma natanūwa changēxmagu i ngēma duūxūgū i marū meāma yaxōgūxū, rū ngēxguma nixī i chanangúxēēxū i ngēma aixcūma Tupanaarū cuèx i üünexū. Natürū ngēma cuèx rū tama ñoma i naānewa ne naxū, rū bai i ñoma i naāneārū āēxgacūgū i paxa tá iyarūxoxūwa ne naxū.

<sup>7</sup> Natürū ngēma cuèx rū Tupanawa nixī i ne naxūxū. Rū ngēma cuèx nixī ga noxri tauta naāne ūxgu Tupanaxīcatama nūxū cuáxū ga na ñuxācū tá tūxna naxāāxū i maxū i taguma gūxū.

<sup>8</sup> Natürū yema Tupana nagu rūxīnūxū, rū taxuūma ga ñoma ga naānecūāx ga āēxgacū nūxū nacuèx. Yerū yexguma chi aixcūma nūxū

nacuèxgügu ga yema Tupana nagu rüxnüxü rü tãu chima curuchawa nayapotagü ga guma mecü ya tórü Cori.

<sup>9</sup> Rû ngemachiga nixĩ i Tupanaãrû ore i ümatüxüwa i ñaxü:

“Rû ngẽma duüxügü i Tupanaxü ngechaügüxcèx, rü nüma nanamexẽẽ i tacü i taxúema nüxü dauxü, rü taguma texé nüxü ñnüxü, rü bai i texé nagu rüxnüxü”,

ñaxü.

<sup>10</sup> Rû ngẽma Tupana mexẽẽxü naxcèx i ngẽma duüxügü i nüxü ngechaügüxü, rü ñuxma rü tüxü nüxü nacuèxẽẽ i ngẽma, yerü núma nanamu ga Naãe i Üünexü na taxcèx nangoxẽẽãxüxcèx. Rû ngẽma Naãe i Üünexü rü guxüxüma nacuèx, rü èixrüxü i ngẽma Tupanaxĩcatama nüxü cuáxü rü ta nüxü nacuèx.

<sup>11</sup> Rû duüxügütanüwa rü ¿texé nüxü tacuèx na tacügu naxĩnüxü i wüxi ya yatü? Rû naãexĩcatama nixĩ i nüxü cuáxü i ngẽma nagu naxĩnüxü i ngẽma yatü. Rû ngëxgumarüü ta Tupanaãe i Üünexüxĩcatama nixĩ i nüxü cuáxü na tacügu naxĩnüxü ya Tupana.

<sup>12</sup> Rû yixema rü tama ñoma i naãnecüãx i naãe nixĩ ga iyauxgüxü. Natürü tanayauxgü i ngema Naãe i Üünexü ga Tupana taxcèx núma muxü na aixcüma nüxü icuáxüxcèx i guxüma i ngẽma mexügü ga Tupana norü ngechaümaã tüxna ãmarexü.

<sup>13</sup> Rû ñuxma na pemaã nüxü tixuxü i ngëmachiga, rü Tupanaãe i Üünexü toxna ãxü i oremaã nixĩ i pemaã nüxü tixuxü. Rû tama ore i torü cuèxwa tayaxuxümaã nixĩ i pemaã nüxü tixuxü. Rû



ngẽmaãcü nüxũ tixu i Tupanaãẽ i Üünexũãrũ ore namaã i ngẽma duũxũgũ i aixcüma Tupanaãẽ nawa ngẽxmagũxũ.

<sup>14</sup> Rũ texé ya tama Tupanaãẽ i Üünexũ tümawa ngẽxmaxẽ, rũ taxucürüwa tanayaxu i ngẽma Tupanaãẽ i Üünexũ tüxũ nguxẽẽxũ, erũ tümacèx ya yíxema duũxẽ rũ natücèxmamare nixĩ. Rũ tama nüxũ tacuèxéga erũ yíxema Tupanaãẽ i Üünexũ tümawa ngẽxmaxẽĩcatama tixĩ ya nüxũ cuáxe na tanangugũxũ na ñuxũ ñaxũchiga yĩixũ i ngẽma Tupanaãẽ i Üünexũ tüxũ nguxẽẽxũ.

<sup>15</sup> Rũ yíxema duũxẽ ya Tupanaãẽ i Üünexũ tümawa ngẽxmaxẽ, rũ meã tanangugũ i guxũma. Natürũ ngẽma togũ i duũxũgũ i tama Tupanaxũ cuèxgũxũ, rũ taxucürüwama tümaãrũ maxũxũ nangugũ ya yíxema duũxẽ ya aixcüma Tupanaãẽ tümawa ngẽxmaxẽ.

<sup>16</sup> Erũ Tupanaãrũ ore i ümatüxũwa rũ ñanagürũ:  
 “¿Texé nüxũ tacuèx na tacügu naxĩnũxũ ya tórũ Cori? ¿Rũ texé nüxũ tacuèx na Tupanaxũ taxucuxẽxũ?”

ñanagürũ. Natürũ yixema nixĩ i aixcüma nüxũ icuáxũ i ngẽma Cristu nagu ruxĩnũxũ.

### 3

*Pauru rũ Aporu rũ wüxigu Tupanaãxĩ napuracüe*

<sup>1</sup> Pa Chaueneẽgũx, yexguma noxri petanüwa changuxgu, rũ taxucürüwa ngẽma duũxũgũ i Tupanaãẽ nawa ngẽxmaxũmaã chidexaxürũũãcü pemaã chidexa. Natürũ ñoma i naãnecũãx i tama Tupanaxũ cuèxgũxũmaã chideaxgurũũ nixĩ ga

pemaã chidexaxũ. Yerũ pema rũ yexwacèx, peyaxõgũ ga yexguma, rũ yemacèx yexwacèx yaxõgũxũmaã chideaxũrũũacũ pemaã nũxũ chixu ga Cristuchiga.

<sup>2-3</sup> Rũ tauxchaxũ ga oremaã pexũ changúexẽẽ, ngẽxgumarũũ i wũxi i õxhana ega noxri nabuxgu rũ naẽgũnenixũ ya tauxchaãcũ yaxaxũne nũxna taxã. Rũ yemaãcũ tauxchaxũ ga oremaã pemaã nũxũ chixu ga Tupanaãrũ ore ga noxrix, yerũ taxucũrũwa nũxũ pecuèxéga ga Tupanaãrũ ore ga guxchaxũ. Rũ ñũxma rũ ta tama nũxũ pecuèxéga i Tupanaãrũ ore i guxchaxũ, erũ ñoma tama yaxõgũxũ i duũxũgũrũũtama pemaxẽ. Rũ dũcax, ngẽxguma ñũxma rũ ta pixãũxãchiwèxegu rũ pegũmaã penuẽgu, rũ ngẽmawa nangox na ngẽma tama yaxõgũxũrũũacũtama nagu perũxĩnũẽxũ rũ ñoma i naãnecũãxrũũacũtama na pemaxẽxũ.

<sup>4</sup> Rũ ngẽxguma petanũwa wũxie ñágũgu rũ:

“Choma rũ Pauruwe charũxũ”, ñágũgu, rũ togue rũ:

“Choma rũ Aporuwe charũxũ”, ñágũgu, rũ ngẽmawa nũxũ tacuèx na ngẽma duũxũgũ i tama yaxõgũxũrũũacũma na pemaxẽxũ.

<sup>5</sup> Rũ ngẽxguma meã nagu rũxĩnũẽgu, ¿rũ tacũ chixĩ i choma i Paurux? rũ ¿tacũ nixĩ i nũma i Aporux? Toma rũ Tupanaãrũ duũxũgũmare tixĩgũ, rũ togagu nixĩ ga nũxũ peyaxõgũxũ ga tórũ Cori ya Ngechuchu. Rũ wũxichigũ ga toma rũ tanaxũ ga yema puracũ ga tórũ Cori toxna ãxũ.

<sup>6</sup> Rũ chauxũtawa nixĩ ga nũxũ pexĩnũẽxũ rũ peyaxõgũxũ ga Tupanaãrũ ore ga noxrix. Rũ Aporu nixĩ ga pexũ rüngũxẽẽcũ na yexeraãcũ meã

peyaxögüxü ga yema ore. Natürü Tupana nixi ga pexü maxëxëëcü.

7 Rû ngëmacèx woo yixema tüxira duüxügümaã nüxü ixuxe i Tupanaärü ore rû woo yixema wixwena yexeraãcü duüxügüxü ngüexëxë, rû taxuüma tixigü. Natürü Tupana nixi ya guxüma ücü, erü nüma nixi i duüxügüxü namaxëxëëcü.

8 Rû ngëmaãcü ya yixema tüxira duüxügümaã nüxü ixuxe i Tupanaärü ore, rû yixema wixwena yexeraãcü duüxügüxü ngüexëxë rû tawüxigumare i ngëma puracüwa. Natürü Tupana rû tá tüxü nanaxütanü i tümaärü puracü ya wüxichigü ngëxgumarüü na ñuxäcü tanaxüxü i ngema puracü..

9 Rû ngëmaãcü i toma rû wüxigu Tupanaãxü tapuracüe. Rû ngëmaãcü nixi i perü maxüwa napuracüxü ya Tupana na nüma nanaxwëxexüãcüma pixigüxüçex.

10 Rû choma nixi ga Tupana choxü muxü na chaxira pemaã nüxü chixuxüçex ga Cristuchiga. Rû togü nixi ga chowena yexeraãcü pexü ngüexëëxü. Natürü guxãma ya texé ya naxüxe i ñaã puracü rû name nixi i taxuãe na meã tanaxüxüçex.

11 Rû ñaã puracü rû Ngechuchu ya Cristuwa nixi ga inaxügüxü, rû ngëmacèx taxucürüwama texé tayangucuchixëe i to i tüxü maxëxëëcü.

12 Rû ñuxma na norü puracü ixüxü i wüxichigü i yixema, rû tanaxwëxe i taxuãe na aixcüma meã naxüxü i ngëma. Erü yixema aixcüma meã naxüxe i norü puracü, rû ñoma wüxi i Ipataarü üruü i uirümü rû dïerümü rû nuta i mexëchixümaã üpataxürüü tixi. Natürü yixema tama aixcüma meã naxüxe i

ngēma Cristuarū puracū rü ñoma ĩpataarū ũruŭ i chixexŭ i naĭ rü naĭxātü rü dexnemenèxãmaremaã ũpataxŭrŭŭ tixĭ.

13 Natŭrŭ ngēxguma naguxgu i naãne, rü tá nangox na ñuxãcŭ naxŭãxŭ i Tupanaarŭ puracŭ i wŭxichigŭ i duŭxŭ. Erŭ ngēma ngunexŭgu rü tá nangēxma ya ũxŭ ya taxŭchine. Rŭ ñoma tacŭ ũxŭwa iguxŭrŭŭ tá nixĭ i Tupana nŭxŭ na ũxŭ i wŭxichigŭ i duŭxŭarŭ puracŭ na nŭxŭ nacuáxŭcèx ngoxi aixcŭma name rü ěxna tama.

14 Rŭ yĭxema aixcŭma meã naxŭxe i Cristuarŭ puracŭ, rŭ yima ĩpata ya taixŭne ya tama ũxŭmaã ixaxŭnerŭŭ tá nixĭ i ngēma tŭmaarŭ puracŭ. Rŭ tá Tupanaxŭtawa tanayaxu i tŭmaarŭ natanŭ naxcèx i ngēma taxŭxŭ.

15 Natŭrŭ yĭxema tama aixcŭma meã naxŭxe i ngēma puracŭ, rŭ yima ĩpata ya tama taixŭne ya ũxŭmaã ixaxŭnerŭŭ tá nixĭ i ngēma tŭmaarŭ puracŭ. Rŭ tá ngēxma inayarŭxomare i guxŭma i ngēma taxŭxŭ. Rŭ tŭxicatama tãŭtãma tixa ñoma wŭxi i duŭxŭ i ũxŭemawa iyagoxŭrŭŭ.

16 ¿Tama ěxna nŭxŭ pecuèx i pema rŭ Tupana-pata na pixĭgŭxŭ, rŭ ngema Naãe ya Tupana rŭ pewa na namaxŭxŭ?

17 Rŭ ngēxguma texé pexŭ chixetanŭxëègu, rŭ Tupana tá tŭxŭ napoxcu, erŭ Tupanapata ya nawa namaxŭne rŭ naxŭŭne. Rŭ pematama nixĭ ya yima Tupanapata na pixĭgŭxŭ.

18 Tama name i texé tŭgŭtama tawomŭxëe. Rŭ ngēxguma petanŭwa texé tŭgŭgu rŭxĭnŭgu na wŭxi i duŭxŭ i nŭxŭ cuáxe na tĭxŭ i ñoma i naãnewa, rŭ name nixĭ i ñoma taxuŭma tacuáxŭrŭŭ tŭgŭ tixĭxëe. Rŭ ngēxguma tá nixĭ i wŭxi i duŭxŭ i

aixcūma nūxŭ cuáxe tá tiĩxŭ.

<sup>19</sup> Erü ñoma i naãneãrŭ cuèx rŭ wŭxi i ngẽãẽmare nixĩ i Tupanacèx. Erü Tupanaãrŭ ore i ũmatŭxŭwa rŭ ñanagŭrŭ:

“Rŭ ngẽma duũxŭgŭ i nŭgŭgu rŭxĩnŭèxŭ na nūxŭ cuèxŭchigŭxŭ yĩxŭ, rŭ norŭ cuèxgutama Ínanatŭexẽẽ ya Tupana”,

ñanagŭrŭ.

<sup>20</sup> Rŭ toxnamana i Tupanaarŭ orewa rŭ ñanagŭrŭ ta:

“Tórŭ Cori ya Tupana rŭ nūxŭ nacuèx na taxuwama namexŭ i ngẽma norŭ ĩnŭ i ngẽma duũxŭgŭ i ñoma i naanewa cuèxwa ngugŭxŭ”,

ñanagŭrŭ.

<sup>21</sup> Rŭ ngẽmacèx tama name i texé tŭgŭ ticuèxŭxŭ ega duũxŭgŭarŭ cuèxwamare tarŭxŭxgu.. Erü Tupana rŭ marŭ pexna nanaxã i guxŭma na pexrŭ yĩxŭcèx.

<sup>22</sup> Rŭ ngẽmacèx i choma i Pauru, rŭ taeneẽ ya Aporu, rŭ taeneẽ ya Pedru, rŭ ñoma i naãne, rŭ torŭ maxŭ, rŭ torŭ yu, rŭ ñomatama i ngunexŭ, rŭ moxŭãrŭ ngunexŭ, rŭ guxŭma i ngẽma rŭ pexrŭ nixĩ.

<sup>23</sup> Rŭ pematama rŭ Cristuarŭ pixĩgŭ. Rŭ Cristu rŭ Tupanaãrŭ nixĩ.

## 4

*Yema ngúexŭgŭ ga Ngechuchu imugŭxŭãrŭ puracŭchiga*

<sup>1</sup> Rŭ ngẽmacèx tanaxwèxe i tomaã nagu perŭxĩnŭẽ na Cristuarŭ puracŭtanŭxŭmare na tixĩgŭxŭ. Rŭ nŭma nixĩ i toxŭ namuxŭ na

pexŭ tangúexēēxŭcèx ga yema ore ga noxri Tupanaxĩcatama nüxŭ cuáxŭ.

<sup>2</sup> Rŭ ngēxguma texé tacŭ rŭ puracŭ tŭxna āxgu, rŭ name nixĩ i aixcŭma tayanguxēē i ngēma puracŭ i tŭxna taxāxŭ na ngēmaācŭ itanawéxŭcèx na aixcŭma wŭxi i duŭxŭ i mexŭ tixĩxŭ.

<sup>3</sup> Rŭ ngēmacèx i ñuxma na meā chayanguxēēchaŭxŭ i ngēma puracŭ i Tupana choxna āxŭ, rŭ taxucèxma chaugŭcèx chaxoegaāē ega woo choxna pecagu rŭ ēxna tacŭ rŭ āēxgacŭgŭ choxna caxgu naxcèx i ngēma puracŭ i chaxŭxŭ. Rŭ woo i chomatama rŭ taxuxŭcèxma íchicuèx na ngextá chixri chanaxŭxŭ i ngēma puracŭ.

<sup>4</sup> Natŭrŭ ñuxma na chomatama nagu charŭxĩnŭxŭ na nataxuŭma i chorŭ chixexŭ i Tupanapēxewa, rŭ tama ngēmacèx Tupana choxŭ nadau na changearŭ pecaduāxŭ. Erŭ nümatama ya tórŭ Cori ya Tupana nixĩ i aixcŭma choxŭ nacuáarŭ maxŭāxŭ.

<sup>5</sup> Rŭ ngēmacèx tama name na toxŭ pengugŭarŭ maxŭāxŭ naxŭpa na núma naxŭxŭ ya tórŭ Cori. Natŭrŭ name nixĩ i nüxŭ ípenanguxēē, erŭ nüma tá nixĩ i nangoxēēāxŭ i guxŭma i ngēma ñuxma icúxŭ rŭ guxŭma i ngēma duŭxŭgŭ naāēwa nagu rŭxĩnüēxŭ. Rŭ ngēxguma tá nixĩ ya Tupana i tŭmamaā nataāēxŭ ya wŭxichigŭ ya yixema aixcŭma mexŭ ŭgŭxe.

<sup>6</sup> Pa Chaueneēgŭx, perŭ mexŭcèx nixĩ i pemaā nüxŭ tixuxŭ i ngēma ore na ngema Tupana naxwèxexŭācŭma pemaxēxŭ. Rŭ choma rŭ Aporu nixĩ i perŭ cuèxrŭŭgŭ tixĩgŭxŭ na towa pengúexŭ na Tupanaārŭ ore pemaā nüxŭ ixuxŭrŭŭācŭ penaxŭxŭ. Rŭ ngēmacèx tama name na wŭxi i perŭ

nguxēētaexūmaã petaãēgūxū rü to rü nüxū pex-  
oexū.

<sup>7</sup> Rū ñuxma rü pexna chaca, ¿rū texé tixĩ ya  
yíxema pemaã nüxū ixuxe na togüarü yexera pexū  
ixíxēxē? ¿Erü guxūma i ngema cuèx i pexū  
ngēxmaxū rü Tupana pexna nanaxā? Rū ñuxma  
na nüma pexna naxāãxū i ngēma cuèx ¿rū tüxcüü  
pegü picuèxüügü ñoma pematama perü poramaã  
penayaxuxürüü?

<sup>8</sup> Rū pegügu perüxĩnüēgu rü aixcūma marü  
meãma Tupanaxū picuèxüchi rü marü pexū  
nangēxma i guxūma i tacü i penaxwèxexū na  
naxütawa pengugūxúcèx. Rū pegügu perüxĩnüēgu  
rü ñoma ãēxgacügü i taxürüü pixĩgü rü taxuūma  
toxütawa penaxwèxe i ñuxmax. ¡Chierü aixcūma  
Tupanapēxewa ãēxgacügü pixĩgügu na toma rü ta  
wüxigu pemaã ãēxgacügü na tixĩgūxúcèx!

<sup>9</sup> Rū toma na Ngechuchu toxū imugūxū, rü  
chauxcèx rü wixwe toxū nawogü ya Tupana.  
Rü ñoma poxcuexū i yuewa íxürüü tixĩgü. Rū  
ñoma wüxi i tacü i nüxū nacugüexürüü tixĩgü  
i napēxewa i Tupanaãrü orearü ngeruügü i  
daxücūāx, rü napēxewa i ñoma i naānecūāx i  
duüxügü, rü napēxewa i guxūma i tacü i Tupana  
üxū.

<sup>10</sup> Rū ñuxma na Cristuwe tarüxĩxū, rü ngēmacèx  
taxuūma icuáxū toxū nawogü i duüxügü, natürü  
i pema rü pegügu perüxĩnüēgu rü guxūxūma  
pecuèx i Cristuchiga. Toma nüxū tacuèx na  
duüxügüpēxewa taturaexū, natürü i pema rü  
pegügu perüxĩnüē na aixcūma peporaexū. Rū  
duüxügü toxū naxo, natürü pexū nangechaügü.

<sup>11</sup> Rū ñuxma rü ta tama inayacuèx na ngúxū

tingegüxü, erü ñuxma rü ta taiya toxü nangux, rü titawae, rü tangexchiru. Rü duüxügü rü chixri tomaã nachopetü, rü tangepata.

12 Rü tipae na yeücürü toxmëxmaã tapuracüeechaxü. Rü duüxügü rü tacü tomaã nixugüe, natürü i toma rü mexü i oremaã tanangãxügü. Rü towe ningëxütanü, natürü yaxna namaã taxĩnüe.

13 Rü chixri tochiga nidexagü, natürü i toma rü meã nachiga tidexagü. Rü ñoma guxchirexü nadaugüxürüü tomaã nixĩgü, rü ñoma duüxügü i taxuwama mexüãcü toxü nixĩxëë. Rü ñuxma rü ta ngemagutama tomaã naarüxĩnüe.

14 Tama pexcëx chanaxümatü i ñaã popera na pexü chaxãneëxëxüçèx. Natürü pexcëx chanaxümatü na pexü chixucuxëgüxüçèx chauxacügüxüchirüü, erü pexü changechaü.

15 Erü woo nangëxmagu i muxüma i perü ngüxëëruügü i Cristuchiga pexü ngúexëëxü, natürü chaxicatama nixĩ i penatü chiixü ga Cristuxü na peyaxuxüwa. Yerü chauxütawa nixĩ ga noxri ga penayaxuxü ga Ngechuchu ya Cristuarü ore i tüxü maxëxëëxü. Rü ngëmacëx chaxicatama nixĩ i penatü chiixü i perü õwa.

16 Rü ngëmacëx pexü chacèèxü na chauxruxü meã pemaxëxü.

17 Rü ngëmacëx pexütawa chanamu ya Timutéu ya poraãcü nüxü changechaücü ya chaune ixïcü i tórü Coriarü orewa. Rü nüma rü aixcüma meã nayanguxëë i guxüma i ngëma nagu chana-muxü. Rü nüma tá pexna nüxü nacüexãchixëë na ñuxãcü Ngechuchu ya Cristu naxwëxexüãcüma meã chamaxüxü rü chanangúexëëxü ga yema



yaxõgüxü ga natanügu chixügüxü.

<sup>18</sup> Rü ñuxre i pemagü rü pegü picuèxüügü, erü nagu perüxñüê na tagutáma pexütawa íchayadauxü.

<sup>19</sup> Natürü ngëxguma nanaxwèxegu ya tórü Cori, rü paxa tá ngema chaxü na pexü íchayadauxüçèx. Rü ngëxguma rü tá chomaxüchi nüxü chadau ngoxi ngëma duüxügü i nügü icuèxüügüxü nüxü nangëxma i Tupanaärü pora rü éxna yadoragümare.

<sup>20</sup> Erü Tupanaarü pora rü tama nüxü tixumare, natürü nagu ítamaxé i ngema pora.

<sup>21</sup> ¿Rü ñuxma rü tacü éxna nixí i penaxwèxexü i pema? ¿Penaxwèxe na pexü chingagüxü i ngëxguma ngema changuxgu, rü éxna penaxwèxe na pexü changechaüãcüma rü pemaã chamecümaãcüma pexü na íchayadauxü?

## 5

### *Duüxügü i chixri maxëxüchiga*

<sup>1</sup> Rü duüxügü nüxü nixugügü rü wüxi i yatü i petanüwa rü naërucümaãtama naxãmèx. Rü ngëma nixí i pecadu i poraãcü chixexüchixü, erü woo ngëma duüxügü i tama yaxõgüxütanüwa rü tama ngëmaãcü naxüpetü.

<sup>2</sup> ¿Rü ñuxãcü i pema i ngëxguma i pegü picuèxüügüamaxü? Rü narümemaé chi nixí na poraãcü pengechaügüxü. Rü ngëma yatü i ngëma chixexü üxü rü name nixí na ípenamuxüchixü i petanüwa.

<sup>3</sup> Rü woo tama petanüwa changëxmagu i chomax, natürü guxüguma pegu charüxñü. Rü ñoma

pexūtawa changēxmaxūrūū rü tórü Cori ya Ngechuchu ya Cristuégagu pemañ nüxū chixu na tacü tá namañ pexūxū i ngēma duūxū.

<sup>4</sup> Rū name nixī i tórü Cori ya Ngechuchu ya Cristuégagu pengutaquēxegü. Rū nüma ya tórü Cori ya Ngechuchu rü tá napetanügu na pexū naporaexēxücèx. Rū choma rü tá pexna chacuèxāchi i chorü yumüxēwa.

<sup>5</sup> Rū ngēma norü poxcu i tá nüxna pexāxū i ngēma yatü, rü ngēma tá nixī na ípenamuxūchixū i petanüwa na Chataná ngúxū nüxū ingexēxücèx. Rū ngēmaācū tá inayarüxo i naxūneārü ngúchañ i chixexū, natürü naāē rü tá namaxū i ngēxguma wena núma naxūxgu ya tórü Cori ya Ngechuchu.

<sup>6</sup> ;Rü tama name i pema rü pegü picuèxūñ naxcèx i ngēma pexūxū! ¿Tama ēxna nüxū pecuèx i ngēma ore i ñaxū:

“Wüxi i íraxū i pāūārü puxēēruñ rü taxūma i pāūchara nipuxēē”, ñaxū?

<sup>7</sup> Rū ngēmacèx name nixī i nüxū perüxoe i guxūma i nuxcūmañxū i pecūma i pexū chixexēxū. Rū ngēxguma ngēmaācū penaxūxgu, rü ñoma ngexwacaxūxū i pāū i ngearü puxēēruñāxū i Ūpetüchigaarü petawa ingōxūrūū tá pime. Rū ñuxma i pema rü aixcūma ngexwacaxūxū i duūxügü pixīgü, yerü Cristu rü ñoma wüxi i carnerurūū marü tachicüü tórü pecaducèx nayu.

<sup>8</sup> Rū ngēmacèx name nixī i nüxū tarüxoe i nuxcūmañxū i tacūma i chixexügü rü aixcūma Tupanagu tarüxñnüē rü meñ naxcèx tamaxē, erü ngexwacaxūxū i norü duūxügü tixīgü.

9 Nūxīraūxū ga chorū poperawa rü pemaã nūxū chixu na tama natanūgu pexāgūxū i ngēma duūxūgū i naī i ngemaã naxūneārū ngūchaū ūgūxū.

10 Natürü yexguma yema ñachagu pexū, rü tama pemaã nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i nge- maã maxēmarexū, rü ēxna ngēma duūxūgū i guxūma i tacū nūgūna nugūchaūgūxū, rü ēxna ngītèèxgūxū, rü ēxna ngēma duūxūgū i tupanane- tachicūnèxāxū icuèxūūgūxū. Erü ngēxguma chi naxchaxwa ípechoūxgu i ngēma duūxūgū, rü chi taxucürüwa i ñoma i naānewa pengēxmagū.

11 Natürü yexguma pemaã nūxū chixuxgu na tama natanūgu pexāgūxū i ngēma duūxūgū i chixri maxēxū, rü nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natürü naī i ngemaã maxēxū, rü ēxna aūexū, rü ēxna tupananetachicūnèxāxū icuèxūūgūxū, rü ēxna oregūtèèxgūxū, rü ēxna ngāxēwèxegūxū, rü ēxna ngītèèxgūxū. Rü ngēma duūxūgū nixī i pe- maã nūxū chixuxū na tama namexū na natanūgu pexāgūxū rü bai i namaã na pechibūexū.

12-13 Erü tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rü Tupana tā nixī ya nūxna çacū i ngēma duūxūgū. Natürü i pema rü pemēxwa nangēxma na nūxna peçaxū i ngēma peeneēgū i yaxōgūxū i tama meã maxēxū. Rü name nixī i petanūwa ípenamuxūchi i ngēma duūxū i chixri maxūxū.

## 6

*Ngēxguma tacū rū guxchaxū tūxū ngēxmagu taeneēmaā, rū tama name i āēxgacūgū i tama yaxōgūxūpēxewa tayamexēē i ngēma*

<sup>1</sup> Rū ngēxguma wūxie i pema pexū nangēxmagu i tacū rū guxchaxū i wūxi i peeneē i yaxōxūmaā, ģrū tūxcūū wūxi i āēxgacū i tama yaxōxūārū ngūxēēcèx ípeyaca na nūma pexū namexēēāxūcèx i ngēma perū guxchaxūgū? ģRū tama ēxna inamexū i ngēma peeneēgū i yaxōgūxū na namexēēgūxū i ngēma perū guxchaxūgū?

<sup>2</sup> ģTama ēxna nūxū pecuèx na yixema na yaxōgūxū tá yīixū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīixū i ñoma i naānecūāx i duūxūgūxū picagūxū, ģrū tūxcūū taxucūrūwa i pematama penamexēē i ngēma perū guxchaxūgū i írachiréxū?

<sup>3</sup> ģTama ēxna nūxū pecuèx rū woo ngēma daxūcūāx i Tupanaārū orearū ngeruūgū, rū yixema tá yīixū i nūxū icagūxū? Rū ngēmacèx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū.

<sup>4</sup> Rū ngēmacèx, ngēxguma tacū rū guxchaxū pexū ngēxmagu i ñoma i naānewa, ģrū tūxcūū i ngēma āēxgacūgū i tama yaxōgūxūxūtawa pegū ípeyaxuaxūgūxū na pexū namexēēgūāxūcèx i ngēma?

<sup>5</sup> Rū pemaā nūxū chixu i ngēma ore na pexāneēxūcèx. ģÉxna tataxuma i petanūwa ya

wüxie ya nüxü cuáxe na tanamexêẽxü i ngêma guxchaxüğü i petanüwa ngêxmaxü?

<sup>6</sup> Rû tama pegümaã penuẽxĩcatama, natürü naetü rü ãẽxgacüğü i tama yaxõgüxüxütawa pexĩ na penamexêẽxücèx i ngêma perü guxchaxüğü.

<sup>7</sup> Rû ngêma na pegümaã penuẽxü, rü ngêma rü poraãcü chixexü nixĩ. ¿Rü tüxcüü tama yaxna namaã pexĩnüẽ i ngêma guxchaxüğü i peeneẽ pemaã üxü? ¿Rü tüxcüü tama namaã peporae ega texé perü tacücèx ngĩxgux?

<sup>8</sup> Natürü i pema rü poraãcü chixexü pexüe, erü woo peeneëğü i yaxõgüxüãxü rü ta pengix..

<sup>9-10</sup> ¿Tama êxna nüxü pecuèx na ngêma duüxüğü i chixexü ügüxü rü nataxuxütáma i nachica i ngextá Tupana ãẽxgacü íyĩxüwa? ¡Rü tama name i pegütama pewomüxêëğü! Erü ngextá Tupana ãẽxgacü íyĩxüwa rü nataxütáma i nachica i ngêma duüxüğü i naĩ i ngemaã ipexü, rü ngêma duüxüğü i tupananetachicünèxãxü icuèxüüğüxü, rü ngêma duüxüğü i naxmèxèchita rü êxna natechita ngêãêxü, rü ngêma yatüğü i naxrüü yatüxümaã ngêãêxü, rü ngêma ngĩtèèxgüxü, rü ngêma duüxüğü i nügünaxica nanuxüchixü i norü ngêmaxüğü, rü ngêma duüxüğü i ngãxèwèxegüxü, rü ngêma duüxüğü i oregütèèxgüxü, rü ngêma duüxüğü i womüxèèwèxegüxü. Rû guxüma i ngêmagü rü nataxütáma i nachica i ngextá Tupana ãẽxgacü íyĩxüwa.

<sup>11</sup> Rû yexgumarüütama pixĩgü ga ñuxre ga pema ga üpax. Natürü i ñuxma ya Tupana rü marü pexü ínanapi i perü chixexü na noxrüicatama pixĩgüxücèx. Rû ñuxma rü aixcüma napêxewa

pime yerü Naãe i Üünexü rü tórü Cori ya Ngechuchu ya Cristuégagu marü perü pecaduna pexü ínanguxüxêe.

*Ñuxãcü naxüüne i taxüne*

<sup>12</sup> Rü ñuxre i pema rü ñaperügügü:

“Rü marü name na chanaxüxü i ngêma chanaxwêxexü”, ñaperügügü. Rü aixcüma nixĩ i ngêma, natürü tama guxü i ngêma ixügüxü rü tüxü name. Rü aixcüma nixĩ i Tupana choxü ínguxuchixêexü na chanaxüxücèx i ngêma chanaxwêxexü, natürü tama name na tacü rü chixexügu chaugü changuxêexü na chomaã inacuáxücèx.

<sup>13</sup> Rü ngëxgumarüü ta rü ñuxre i duüxügü rü ñanagürügü:

“Rü õna rü taxü necèx nixĩ, rü taxüne rü õnacèx nixĩ”, ñanagürügü. Rü aixcüma ngêmaãcü nixĩ, natürü ya Tupana rü tá inayanaxoxêe i guxüma i ngêma. Rü taxüne rü tama naĩ i ngemaã namaã na ingêãẽmarexücèx nixĩ. Erü taxünemaã nixĩ i naxüxü i tórü Coriarü ngúchaü. Rü tórü Cori nixĩ ya taxünexü maxêecü.

<sup>14</sup> Rü yema Tupana wena namaxêexürüü ga tórü Cori ya Ngechuchu, rü ngëxgumarüü tá ta norü poramaã wena tüxü namaxêxêe.

<sup>15</sup> ¿Rü tama êxna nüxü pecuèx na ngêma pexene rü Cristuarü na yĩxü? ¿Rü ñuxãcü i ngêma chaxune i Cristuarü ixixü rü ngexü i ngêãexümaã inapexü? Taxucürüwama ngêmaãcü nixĩ.

<sup>16</sup> ¿Rü êxna tama nüxü pecuèx ega wüxi i ngexü i ngêãexümaã inapexgu ya wüxi ya yatü rü ngêma taxre i naxüne rü wüxitama i naxüne yĩxü? Erü Tupanaãrü ore i ümatüxüwa rü ñanagürü:

“Ngēma taxre i naxūne rü wūxitama i naxūne tá nixī”,  
ñanagürü.

<sup>17</sup> Natürü ngēxguma wūxi i duūxū rü tórü Cori ya Cristuaxū yaxōōxgu, rü ngēma naāē i ngēma duūxū rü Cristuāēmaā wūxigutama narūxīnūē.

<sup>18</sup> Rü ngēmacèx name nixī na nūxū perūxoexū i pexeneārü ngúchaū na pexūxū. Rü guxūma i togū i pecadu i wūxi i duūxū ūxū rü tama naxūnexū nachixexēē. Natürü ngēma na naī i ngemaā nangēāēxū rü ngēma waxi nixī i naxūnexū chixexēēxū.

<sup>19</sup> ¿Tama ēxna nūxū pecuèx i pexene rü Tupanaāē i Üünexūpata na yīxū? Rü pegu nixī i naxāchiūxū i ngēma Naāē i Üünexū i Tupana pexna muxū. Rü ngēmacèx i pema rü tama peguarū yoratama pixīgü.

<sup>20</sup> Erü Tupana rü marü pexcèx nataxe rü poraācü nūxū petatanū. Rü ngēmacèx penaxwēxe i ngēma pexenemaā meā Tupanacèx pemaxē na ngēmaācü namaā penataxēēxū ya Tupana.

## 7

### *Ucuxēgü i āmèxchiga*

<sup>1</sup> Rü ñuxma rü tá pexū changāxū ga yema āmèxchiga ga choxna naxcèx peçaxū ga perü poperawa. Rü narümemaē chi nixī i noxtacūma tama naxāmax ya yatü.

<sup>2</sup> Natürü ngēma na naxūneārü ngúchaū na naxügūmarexū i duūxūgü, rü narümemaē nixī i wūxichigü ya yatü rü na naxāmaxū, rü wūxichigü i nge rü na naxātexū.

<sup>3</sup> Rū yima yatü ya āmacü rü taxucürüwama naxmèxna nügü ninuxū. Rū ngēma nge i ātecü rü taxucürüwama ngītena ngīgü iyanuxū.

<sup>4</sup> Erü ngēma nge i ātecü rü tama ngīgüxūneārü yoratama iyixī, erü ngīte nixī ya ngīxīneārü yora ixīcū. Rū ngēxgumarūŕ ya ngīte rü tama nügüxūneārü yora nixī, erü naxmèx iyixī i naxūneārü yora ixīcū.

<sup>5</sup> Rū tama name i wüxi ya yatü rü namèxna nügü ninuxū, rü ěxna wüxi i ngecü rü ngītena ngīgü iyanuxū, ega tama nügümaã namexēãgu na ñuxre i ngunexū tama nügümaã namaxēxū naxcèx na nayumüxēgüxū. Rū ngēmawena rü name nixī na wenaxārü noxrirūŕ nügümaã namaxēxū na tama Chataná nüxna ñnuxücèx na chixexügu nay-ixēãxücèx.

<sup>6</sup> Rū guxūma i ñaã ore i pemaã nüxū chixuxū i āmèxchiga rü ātechiga rü tama wüxi i mu nixī i ngēma. Natürü pemaã nüxū chixumare na nüxū pecuáxücèx na namexū i ngēmaãcü na penaxūxū.

<sup>7</sup> Rū chomatama nagu charüxñü rü chierü name nixī ega choma chamaxūxürüŕ namaxēgu i guxūma i duūxügü. Natürü Tupana rü wüxichigü i duūxūna nanaxã i nacüma na ñuxãcü namaxēxücèx rü ñuxãcü nagu naxñnuxücèx. Rū ngēmacèx tama guxãma tawüxigu.

<sup>8</sup> Rū ngēma ngemèxgüxū rü ngetegüxū rü yutegüxū rü namaã nüxū chixu rü narümemaē nixī i chauxrūŕ tama naxãmèx rü tama naxãte.

<sup>9</sup> Natürü ngēxguma wüxi i duūxū taxucürüwa naxūneārü ngúchaūmaã naporagu, rü name nixī na naxãmaxū rü ěxna naxãtexū. Erü narümemaē nixī i noxtacüma naxãmèx rü ěxna naxãte na tama



ngema norü ngúchaŭgagu düxwa chixexŭgu nan-guxŭcèx.

<sup>10</sup> Natürü yíxema marü ãmaxê rü âtexe, rü tümamaã nüxŭ chixu na tama namexŭ na tümatexŭ na ítatáxŭ. Rü ngêma mu rü tórü Coriarü mu nixĩ, rü tama choxrü nixĩ.

<sup>11</sup> Natürü ngêxguma chi ngürüãchi wüxi i ngexŭ natexŭ ítèxgu, rü name nixĩ i noxtacüma nangete rü êxna wena natecèx nataegu. Rü ngêxgumarüŭ ta ya yatü rü tama name i namèxŭ ínatèx.

<sup>12</sup> Rü ñuxma rü choxŭ nangêxma i wüxi i ore i tümacèx ya yíxema ãmaxê ngĩmaã i wüxi i nge i tama yaxôxcü. Rü ngêma ore rü choxrütama nixĩ rü tama tórü Coriarü nixĩ. Rü ngêxguma wüxi ya yatü ya ôcü ngĩmaã ãmaxgu i wüxi i nge i tama yaxôxcü, rü tama name i ngĩxŭ ínatèx, ega ngĩma rü aixcüma namaã naxâtechaŭgu.

<sup>13</sup> Rü ngêxguma wüxi i nge i yaxôxcü âtegu namaã ya wüxi ya yatü ya tama yaxôcü, rü tama name i ínatèx ya yima ngĩte ega nüma ya yima yatü rü aixcüma ngĩmaã naxãmèxchaŭgu.

<sup>14</sup> Rü yima yatü ya tama yaxôcü, rü namèx i yaxôxcügagu Tupana nüxŭ nacuèx. Rü ngêma ngecü i tama yaxôxcü, rü ngĩte ya yaxôcügagu Tupana ngĩxŭ nacuèx. Erü ngêxguma chi tama ngêmaãcü yixĩgu, rü chi ngêma naxãcügü rü duŭxŭgü i tama yaxôgüxŭãcügürüŭ tá nixĩgü. Natürü i ñuxma ya naxãcügü rü marü Tupana tüxŭ nacuèx.

<sup>15</sup> Natürü ngêxguma yima yatü ya tama yaxôcü rü namèxŭ ínatáxchaŭgu rü ¡noxtacüma ngĩxŭ ínatá! Rü ngêxgumarüŭ ega ngêma ngecü i tama yaxôcü rü ngĩtexŭ ínatáxchaŭgu, rü ¡noxtacüma

ngĩtexũ ínatá! Rũ ngẽxguma ya yima yatũ ya yaxõcü rũ marũ name ega wena naxãmèxgu. Rũ ngẽma ngecü i yaxõcü rũ marũ name ega wena naxâtegu. Erũ Tupana pexũ nade na pegũ pengechaũgũxũcèx.

<sup>16</sup> Rũ ngẽmacèx, Pa Ngecü i Tupanaãxũ Yaxõxcũx, rũ ngẽxguma cute i tama yaxõxũ cuxũ ítáxchaũgu, namẽ nixĩ i tama cunachũxu, erũ tama nüxũ cucuèx ngoxi tá nüxũ cuyaxõxẽẽ i ngẽma cute rũ ěxna tama. Rũ cumax, Pa Yatũ ya Yaxõxcũx, rũ ngẽxguma cuxmèx i tama yaxõxũ cuxũ ítáxchaũgu, rũ name nixĩ i tama cunachũxu, erũ tama nüxũ cucuèx ngoxi tá ngxũ cuyaxõxẽẽ i ngẽma cuxmèx rũ ěxna tama.

<sup>17</sup> Rũ ñuxma rũ pemaã nüxũ chixu rũ nüma ga Tupana rũ wũxichigũ ga duũxẽna nanaxã ga tũmaãrũ cuèx na tũmaãrũ maxũmaã itacuáxũcèx rũ meã tanaxũxũcèx i ngẽma puracũ ga noxri tũxũ yexmaxũ ga tauta Tupana tũmacèx caxgu. Rũ ngẽma nguxẽẽtae nixĩ i namaã chanangũexẽẽxũ i guxũma i yaxõgũxũ i wũxichigũ ya tupaucawa ngẽxmagũxũ.

<sup>18</sup> Rũ ngẽxguma Tupana naxcèx caxgu i wũxi i duũxũ i marũ Yudíugürũũ íwiechèxmüpẽxechiraũxũ, rũ nüetama nixĩ ega ngẽmaãcütama yixĩgu. Rũ ngẽxguma Tupana nayaũxgu i wũxi i duũxũ i tama íwiechèxmüpẽxechiraũxũ, rũ nüetama nixĩ ega ngẽmaãcütama yixĩgu.

<sup>19</sup> Erũ Tupanapẽxewa rũ nüetama nixĩ ega wũxi i duũxũ rũ ínawiechèxmüpẽxechiraũgu rũ ěxna tama. Erũ ngẽma Tupana aixcũma naxwèxexũ nixĩ na naga naxĩnũxũ i wũxichigũ i duũxũ.

20 Rū wūxichigü i duūxū rü name nixĩ i nawatama napuracü ga yema puracü ga nüxū yexmaxū ga yexguma Tupana noxri naxcèx caxgu.

21 Rū yexguma wūxi ga coriarü duūxū quixĩyane Tupana cuxcèx caxgu, rü tama name i ngēmacèx cuxoegaã. Natürü ngēxguma cuxū natauxchagu na nüxna ícunguxuchixū i ngēma cori, rü marü name na ícunguxuchixū.

22 Rū cuma ga na cucoriāxyane cuxcèx naçaxū ga Tupana, rü name nixĩ i nüxna cucuèxāchi na Cori ya Cristu pecaduwa cuxū ínguxuchixēxū. Rū cuma ga na cungearü coriāxyane cuxcèx naçaxū ga Tupana, rü name nixĩ i nüxna cucuèxāchi na tórü Cori ya Cristuarü duūxū quĩxū i ñuxma na nüxū cupuracūxçèx.

23 Tupana rü marü pexcèx nataxe rü poraãcü nüxū petatanü. ¡Rü ngēmacèx i ñuxma rü tãütáma naga pexĩnüē i ngēma duūxūgü i wenaxārü ñoma i naãneārü chixexūwa pexū gagüchaūxū!

24 Rū name nixĩ, Pa Chaueneēgüx, i wūxichigü i pema rü meã Tupanapēxewa penaxüama ga yema puracü ga noxri pexū yexmaxū ga yexguma Tupana pexcèx caxgu.

25 Rū ñuxma rü tá pemaã nüxū chixu i nachiga i ngēma duūxūgü i ngemèxgüxū rü ngetegüxū. Rū tórü Cori ya Ngechuchu rü taxuüma i mu choxna naxã i ngēmachiga. Natürü tá pemaã nüxū chixu i ñuxãcü nagu charüxĩnü i ngēmachiga. Rū ngēma chorü ore rü aixcüma nixĩ erü choma nixĩ i wūxi i duūxū ga nüxū changechaütümüüácüma choxū nayaxuxū ga tórü Cori.

26 Natürü ngema ñuxma nüxū idauxū i gux-

chaxūgūgagu rü chauxcèx rü chi name i tama nixāmèx i ngēma yatūgū i ngemèxgūxū.

27 Rū ngēxguma marū cuxāmèxgu rü tama name i ngīxū ícutèx. Natürü ngēxguma cungemèxgu rü name i tama cuxāmèx.

28 Natürü ngēxguma cuxāmèxgu rü tama pecadu nixī i ngēma. Rū ngēxguma wūxi i paxū ātegu rü tama pecadu nixī i ngēma. Natürü ngēma ixāmèxgūxū rü ixātegu xū rü tá nayexera i norū guxchaxūgū i ñoma i naānewa, rü ngēma nixī i tama chanaxwèxexū na nūxū nangupetūxū.

29 Pa Chaueneēgūx, pemaā nūxū chixu rü tama muxū i ngunexū tūxū nangēxma na naxūxūcèx i Tupanaārū puracū. Rū ngēmacèx ya yixema ixāmèxgūxe rü name nixī i meā tanaxūgū i Tupanaārū puracū ñoma tangemèxgūxūrū.

30 Rū yixema ngexwaca yutanūgūxe rü yixema peta ūgūxe rü yixema itaxegūxe, rü tama name i ngēmacèx Tupanaārū puracū na ítangēxgūxū.

31 Rū yixema tūxū nangēxmaxē i tūmaārū ngēmaxūgū i ñoma i naānewa, rü tama name i ngēmacèx Tupanaārū puracū na ítangēxgūxū. Erū ñoma i naāne i ñuxma nūxū idauxū rü paxa tá nagux.

32 Rū tama chanaxwèxe na tacūcèx pexoe-gaāēgūxū. Rū ngēxguma wūxi i yatū ngemèxgu, rü Tupanaārū puracūgu narūxīnū rü nagu narūxīnū na ñuxācū Tupanaārū ngūchaū naxūxū.

33-34 Natürü ngēxguma naxāmèxgu ya wūxi ya yatū, rü ñoma i naāneārū ngēmaxūgu narūxīnū rü nagu narūxīnū na ñuxācū namèxū nataāēxēēxū. Rū ngēmaācū muxūgu narūxīnū. Rū ngēxgumarū ta nixī i ngexūgū. Rū ngēma ngexū i ngetexū rü Tu-

panaārū puracūgu narūxīnū, erū marū Tupanana nūgū naxā rū guxū i naxūnemaā rū naāēmaā naxcèx namaxū. Natūrū ngēma ngexū i ātexū rū ñoma i naāneārū ngēmaxūgu narūxīnū, rū nagu narūxīnū na ñuxācū natexū nataāēxēēxū.

<sup>35</sup> Rū perū mexūcèx nixī i pemaā nūxū chixuxū i ngēma, rū tama pexna na chanachuxuxūcèx nixī. Natūrū ngēma ñacharūgū na meā pemaxēxūcèx rū aixcūma penaxūxūcèx i tórū Coriarū puracū.

<sup>36</sup> Rū ngēxguma texé nagu rūxīnūgu na tūmaxācū rū marū na napaxū, rū tūmacèx namexgu na naxātexū, rū marū name i ngīxū taxūte ega aixcūma tūmacèx namexgu. Rū ngēma na naxātexū i tūmaxācū rū tama pecadu nixī.

<sup>37</sup> Natūrū ngēxguma wūxi i yatū nūxū nangēxmagu i norū pacū rū tama nanaxwèxegu na ngīxū naxūtexū, rū ngēma rū ta marū name. Erū naxmēxwa ingēxma rū taxucèxma texé tanachixewe na ngīxū naxūtexūcèx.

<sup>38</sup> Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū yexeraxū i mexū naxū.

<sup>39</sup> Rū wūxi i nge i ātecū rū ngītemēxēwa ingēxma i ngēxguma namaūxgu ya ngīte. Natūrū ngēxguma nayuxgu ya ngīte, rū marū name ega to i yatū i ngīma ngīxū ngūchaūxūmaā naxātegu. Natūrū inaxwēxe na wūxi ya yatū ya yaxōcūmaā naxātexū.

<sup>40</sup> Natūrū chauxcèx rū yexeraācū chi itaāē i ngēxguma chi tāū chima wena naxātegu. Rū ngēma ore rū choxrūtama nixī, natūrū nagu charūxīnū rū Tupanaāē i Ūūnexūārū ĩnū ta nixī.

## 8

*Tupananetachicünèxāgūna naxuaxŭgŭxŭ ga Ōnachiga*

<sup>1</sup> Nŭxma rŭ tá pemaã nŭxŭ chixu i nachiga i ngēma ōnagŭ i ngēma duŭxŭgŭ i tama Ngechuchuaxŭ yaxŭgŭxŭ norŭ tupananetachicünèxāgūna uaxŭgŭxŭ. Rŭ aixcŭma nixŭ i wŭxichigŭ i yixema i meãma nŭxŭ icuáxŭ i ngēmachiga. Natŭrŭ ngēma nŭxŭ na icuáxŭgagu rŭ ñuxguacŭ rŭ yigŭ namaã ticuèxŭxŭ. Natŭrŭ ngēma na yigŭ ingechaŭxŭ rŭ tŭxŭ narŭngŭxēē na yexeraãcŭ meã yaxŭgŭchigŭxŭ.

<sup>2</sup> Rŭ ngēxguma chi texé nagu rŭxŭnŭgu na tacŭxŭ tacuáxŭ, rŭ name nixŭ i nŭxna tacuèxãchi na ngēxguma rŭ ta tama aixcŭma nŭxŭ tacuáxŭ i guxŭma i ngēma cuèx i aixcŭma ixŭxŭ.

<sup>3</sup> Natŭrŭ ngēxguma texé aixcŭma Tupanaxŭ ngechaŭgu, rŭ Tupana rŭ tŭxŭ nacuèx ya yŭxema.

<sup>4</sup> Rŭ ngēma na nangŭxŭ i ngēma ōnagŭ i tupananetachicünèxāgūna naxuaxŭgŭxŭ i duŭxŭgŭ, rŭ meãma nŭxŭ tacuèx na taxuwama namexŭ i ngēma tupananetachicünèxāgŭ erŭ tama aixcŭma Tupanaxŭchi nixŭgŭ. Erŭ wŭxixicatama nixŭ ya aixcŭma Tupana ixŭcŭ, rŭ nataxuma ya naŭ.

<sup>5</sup> Rŭ woo duŭxŭgŭ nagu narŭxŭnŭe rŭ nangexma i muxŭma i tupanagŭ i ñoma i naanewa rŭ dauxŭguxŭ i naanewa, natŭrŭ taxcèx rŭ tama ngemaãcŭ nixŭ.

<sup>6</sup> Erŭ yixema nŭxŭ tacuèx na wŭxitama yixŭxŭ ya Tupana ya Tanatŭ ixŭcŭ. Rŭ nŭma ya Tanatŭ nixŭ i naxŭãxŭ i guxŭma i tacŭ i ngēxmaxŭ, rŭ naxcèx nixŭ i imaxŭxŭ i yixemax. Rŭ ngēxgumarŭŭ

ta nangẽxma i wüxitama ya tórü Cori ya Ngechuchu ya Cristu. Rü yimagagu nixĩ na nangẽxmaxũ i guxũma, rü yimagagu nixĩ i tüxũ nangẽxmaxũ i maxũ.

<sup>7</sup> Natürü tama guxũma i yaxõgüxũ nüxũ nacuèx na nangẽxmaxũ ya wüxitama ya Tupana rü wüxitama ya tórü Cori. Rü ñuxre i nümagü ga ũpa rü nüxũ nayapue na nüxũ yaxõgüãxũ i ngẽma tupananetachicünèxãgü, rü ñuxma rü ta tama aixcuma nüxũ nacuèxgü i ngẽma mexũ i Tupana nüxũ naxwèxexũ. Rü ngẽmacèx nixĩ i ñuxma i nagu naxĩnüèxũ na chixexũ naxügüxũ i ngẽxguma nangõxgüãgu i ngẽma naxũnamachi i togü i duũxügü norü tupananetachicünèxãgüna uaxügüxũ na nüxũ namaã yacuèxüügüxücèx.

<sup>8</sup> Rü yixema nüxũ tacuèx na tama tacü rü namachi na ingõxügagu yĩxũ na Tupana tüxũ dexũ. Rü täütáma yexera time i napèxewa ega nangõxgügu i ngẽma namachi. Rü täütáma yexera tichixe i napèxewa ega tama nangõxgügu.

<sup>9</sup> Natürü i pema i nüxũ na pecuáxũ na tama pecadu yĩxũ na nangõxũ i ngẽma namachi, jrü pexuãègü erü ngürüãchi ngẽma na pengõxügagu chixexügu tá penayixèè i ngẽma peeneègü i tauta aixcuma meã nüxũ cuèxgüxũ na tacü yĩxũ i Tupana nüxũ naxwèxexũ!

<sup>10</sup> Erü cuma na meã Tupanaxũ cucuáxũ, rü ngẽxguma chi cunangõxgu i ngẽma namachi i ngextá tupananetachicünèxãgüxũ íyacuèxüügüxüwa, rü ngürüãchi wüxi i cueneè i tauta meã Tupanaxũ cuáxũ tá cuxũ nadau. Rü ngürüãchi numa rü tá ta nanangõx i ngẽma namachi woo naãewa nagu naxĩnügu na wüxi i

chixexŭ yīxŭ na nangōxŭ i ngēma namachi.

<sup>11</sup> Rŭ ngēmaācŭ i cuma na meā Tupanaxŭ cu-cuáxŭ, rŭ tá icuyanatauxēē i ngēma cueneē i Cristu naxcèx yuxŭ i tauta meā Tupanaxŭ cuáxŭ.

<sup>12</sup> Rŭ ngēmacèx i ngēxguma chixexŭgu cunanguxēēxgu i ngēma cueneē i tauta meā Tupanaxŭ cuáxŭ, rŭ Cristumaā rŭ ta chixexŭ cuxŭ.

<sup>13</sup> Rŭ ngēmacèx i ngēxguma ngēma namachi i changōxŭgagu chixexŭgu chananguxēēxgu i chaueneē, rŭ narŭmemaē nixī i noxtacŭma taguma namachi changōx na tama pecadugu chananguxēēxŭcèx i ngēma chaueneē.

## 9

*Yīxema Cristu tūxŭ muxē na nūxŭ tapuracŭxŭcèx, rŭ tūxna naxŭ i tūmaārŭ natanŭ*

<sup>1</sup> Rŭ pemaā nūxŭ chixu rŭ tórŭ Coritama nixī ya choxŭ yaxucŭ rŭ choxŭ mucŭ na norŭ puracŭ chaxŭxŭcèx, rŭ ngēmacèx taxuŭma i duŭxŭgŭmēxēwa changēxma i űuxmax. Rŭ chomatama chauzetŭmaā tórŭ Cori ya Ngechuchuxŭ chadau, rŭ ngēma puracŭ i nūxŭ chaxŭxŭgagu nixī i peyaxōgŭxŭ i pemax.

<sup>2</sup> Rŭ woo togŭ i duŭxŭgŭ tama choxŭ cuèxgŭchaŭgu na tórŭ Cori choxŭ muxŭ, natŭrŭ i pema rŭ meāma nūxŭ pecuèx na nŭma yīxŭ ga choxŭ namuxŭ. Yerŭ chauxŭtawa nixī ga tórŭ Coriaxŭ peyaxōgŭxŭ, rŭ ngēmawa nūxŭ pecuèx na aixcŭma yīxŭ na nŭma choxŭ namuxŭ.

<sup>3-4</sup> Rŭ űaā nixī i chorŭ dexa i namaā chanangāxŭxŭ i ngēma duŭxŭgŭ i chauchiga idexagŭxŭ:



“¿Ēxna tama name na duŭxŭgŭ choxna naxãxŭ i chorŭ õna rŭ chorŭ axexŭ naxcèx i chorŭ puracŭ?

<sup>5</sup> ¿Ēxna tama inamexŭ ta na wŭxi i ngexŭ i yaxõxŭmaã na chaxãmaxŭ na chayagaxŭcèx ngẽxgumarŭŭ na naxãmaxŭ i Pedru, rŭ naêneegŭ ya tórŭ Cori, rŭ ngẽma togŭ i yatŭgŭ i Tupana imugŭxŭ?

<sup>6</sup> ¿Rŭ ěxna pema nagu perŭxŭnŭegŭ rŭ choma rŭ Bernabéxícatama i tama namexŭ na toxŭ perŭngŭxèegŭxŭ ngẽma togŭ i orearŭ uruŭgŭxŭ na perŭngŭxèegŭxŭrŭŭ?

<sup>7</sup> ¿Tacŭ rŭ duŭxŭ i churarawa ŭxŭ i nŭgŭxŭtama naxŭtanŭxŭ i norŭ õna? ¿Rŭ tacŭ rŭ duŭxŭ i orix itoxŭ i tama namŭxŭ i norŭ o? ¿Rŭ tacŭ rŭ duŭxŭ i carnerugŭna dauxŭ i tama nagŭnenixŭ ne ixaxŭxŭ?” Ngẽma ñacharŭgŭ nŭxŭ i ngẽma duŭxŭgŭ i chauchiga idexagŭxŭ.

<sup>8</sup> ¿Rŭ ñŭxma rŭ tãŭtãma nagu perŭxŭnŭe na chorŭ orexícatama yŭxŭ i ñaã nŭxŭ chixuxŭ! Erŭ Tupanaãrŭ ore ga Moŭché ŭmatŭxŭwa rŭ ta ngẽma ñanagŭrŭ.

<sup>9</sup> Erŭ ngẽma ore rŭ ñanagŭrŭ:

“¿Rŭ ngẽma woca i aruchuarŭ putèxewa puracŭxŭ, rŭ tãŭtãma cunawèxnagu na tama yima aruchuwa nachibŭxŭcèx!” ñanagŭrŭ i ngẽma ore. Rŭ nŭxŭ tacuèx na tama wocagŭgu naxŭnŭxŭ ga Tupana ga yexguma yema ñaxgu.

<sup>10</sup> Natŭrŭ pemaã nŭxŭ chixu rŭ tagu nixŭ ga naxŭnŭxŭ ga yexguma yema ñaxgu ga Tupana. Rŭ tachiga nixŭ ga naxŭmatŭxŭ ga yema ore. Erŭ yŭxema aruchunecŭ ŭxe rŭ yŭxema norŭ oarŭ pŭxwa puracŭxe, rŭ ngẽxguma tapuracŭeyane rŭ

tanaxwèxegü na ítananguxēēgüxü i ngēma norü o i tūxna üxü.

11 Rū toma rü wüxi ya nanetüchire ya itatoxünerüü tixīgü ga yexguma pemaã nüxü tixuxgu ga Tupanaãrü ore. ¿Rü ñuxma rü tama éxna i pexcèx namexü na toxna penaxãxü i tacü i toxü taxuxü?

12 Rū ngëxguma ngēma togü i orearü uruügü petanüwa nayauxgügu i ngēma nüxü taxuxü, rü maneca toma rü yexera name nixī i petanüwa tanayaxu i ngēma toxü taxuxü. Natürü i toma rü tama ngēmaãcü tanaxü. Erü toma rü guxü i guxchaxümaã taporae na tama pexü tanaguxchaxēēxücèx na Cristuaxü peyaxōgüxü.

13 Pema nüxü pecuèx rü guxüma i duüxügü i tupauca ya taxünewa puracüexü, rü ngēma òna ya yima tupaucawa ngëxmaxütama nangōxgü. Rū ngēma duüxügü i tupaucagu Tupanacèx naxünagü dèixü, rü nanade i ñuxre i ngēma namachi norü ngōxruü.

14 Rū ngëxgumarüü ta ya yíxema nüxü ixugüxe i ore i tūxü maxēxēēxü, rü tórü Cori nüxü nixu rü name nixī i tanayauxtanü i ngema tümaarü puracü..

15 Natürü i choma rü taguma ngēmaãcü chanaxü. Rū ñuxma na pexcèx chanaxümatüxü i ñaã popera, rü tama tacü choxna pexãxücèx nixī. Erü ngēma na taguma texéxütawa tacücèx íchaçaxü, rü wüxi i chorü taã nixī. Rū narümemaë chierü nixī na chayuxü naxüpa na texé choxna nayaxuxü i ñaã taã i choxü ngëxmaxü.

16 Rū ñuxma na nüxü chixuxü i ngēma ore i tūxü maxēxēēxü, rü taguma ngēmacèx chaugü chicuèxüü. Erü woetama ngēma nixī i chorü puracü ga Tupana choxna äxü, rü ngēmacèx

taxucürüwama chanangexrū. Erū poraācū chi chachixexūgu i ngēxguma tāū chima nūxū chixuxgu.

17 Rū ngēxguma chi chaugagu chitama chanaxūxgu i ngēma puracū, rū nagu chi charūxīnū na choxū naxātanūxū. Natürū ngēxguma Tupana choxū muxūācūma chanaxūxgu, rū chanaxūama erū woetama ngēma nixī i chorū puracū ga Tupana choxna āxū.

18 ;Rū ñuxma rū tacū tá nixī i chorū natanū naxcèx i ngēma puracū i chaxūxū? Rū dūcax, rū chorū natanū nixī i ngēma taāē i chayaxuxū i ngēxguma ngetanūācūma nūxū chixuxgu i ngēma ore i tūxū maxēxēxū. Rū ngēmaācū woo Tupanapēxewa name na petanūwa chanayaxuxū i chorū natanū na ngēmamaā chamaxūxūcèx, natürū taguma texena naxcèx chaca..

19 Rū woo taxūxemēxēwa changēxma i chomax, natürū guxāmēxēwa chaugū changēxmaxēē, na ngēmaācū yexeraācū muxūma i duūxūg ūxū charūngūxēxūcèx na Cristuaxū yaxōgūāxūcèx.

20 Rū ngēxguma chautanūxū i Yudíugütanūwa changēxmagu, rū namaā chaugū chawūxiguēē na ngēmaācū nūxū charūngūxēxūcèx na Cristuaxū yaxōgūāxūcèx. Rū woo tama yema Moíché ūmatūxū ga mugütūūwa changēxmagu, natürū chayanguxēēāma i ngēma mugū na ngēmaācū Cristuxūtawa chanagagūxū i ngēma duūxūgū i ñuxma rū ta nagu īxū i ngēma mugū ga Moíché ūmatūxū.

21 Rū ngēxguma natanūwa changēxmagu i ngēma duūxūgū i tama Yudíugū ixīgūxū, rū ngēma duūxūgūmaā chaugū chawūxiguxēē na

ngẽmaãcü nüxũ charüngũxẽxũcèx na Cristuaxũ yaxõgũãxũcèx. Natürü taguma íchanangẽx i Tupanaãrũ mugũ erũ guxũguma Cristuarũ mugütũũwa changẽxma.

22 Rũ ngẽxguma natanũwa changẽxmagu i ngẽma duũxũgũ i tama poraãcü Cristuchigaxũ cuèxgũxũ, rũ choma rũ ta ngẽma duũxũgũmaã chaugũ chawũxiguxẽ, na ngẽmaãcü nüxũ charüngũxẽxũcèx na Cristuaxũ yaxõgũãxũcèx. Rũ ngẽmaãcü guxũma i duũxũgũrũũ chaugũ chixĩxẽ, rũ nagũxũraũãcüma naxcèx chadau na ngẽmaãcü düxwa Tupanaxũtawa chanagagũxũcèx i ñuxre i nümagũ.

23 Rũ ngẽmaãcü nixĩ i chapuracũxũ na guxũwama nanguxũcèx i ngẽma ore i tũxũ maxẽxẽxũ. Erũ chanaxwèxe na choma rũ ta choxũ nangẽxmaxũ i ngẽma maxũ i taguma gũxũ, naxrũũ i guxũma i ngẽma duũxũgũ i nüxũ yaxõgũxũ.

24 Pema rũ meãma nüxũ pecuèx i wũxi i inũca i nawa iñaãchixũ rũ muxũma inaxũãchi, natürü wũxixicatama nixĩ i ngẽma nüxĩra ínguxũ rũ nayaxuxũ i norũ ãmare. Rũ name nixĩ i pegũna pedau na Tupana pexna naxãxũcèx i ngẽma perũ ãmare.

25 Guxũma i ngẽma duũxũgũ i nügũ ngũexẽxũ naxcèx i wũxi i inũca na toguegũxũ napora-maexũcèx, rũ meã nügũna nadaugũ na ngẽmaãcü nayauxgũãxũcèx i norũ ãmare i paxaãchirũũ ixĩxũ. Natürü yixema na yaxõgũxũ rũ yigũna tadaugũ na meã naxũgũxũcèx rũ meã imaxẽxũcèx na nayauxgũxũcèx i tórũ ãmare i taguma gũxũ.

26 Rũ ngẽmacèx i choma rũ tama ñoma chauechitamare chiñaxũrũũ chixĩ, rũ tama ñoma tacũ i nügũ dèixũ i ngürüanegumare idagũxũrũũ chixĩ.

27 Rū ngēmacèx meã chaugümaã ichacuèx na taxuũma i chaxuneãrũ ngúchaũ chaxüxücèx. Erũ tama chanaxwèxe i mexũmaã togüxũ changüxēchirēxãcũma chixexũ chaxü rü ngemagagu tama chanayaxu i chorü ãmare.

## 10

*Nayaxucuxēgũ na tama nüxũ yacuèxüũgüxücèx i tupananetachicünèxãgũ*

<sup>1</sup> Pa Chaueneēgũx, chanaxwèxe i nüxna pecuèxãchie ga tacü nüxũ na ngupetüxũ ga yema nuxcũmaũgüxũ ga tórü oxigü ga Moĩchéwe rüxĩxũ. Rũ pema nüxũ pecuèx rü yexguma nawe naxĩxgu rü wüxi ga caixanexũ napēxegu nixũ rü nayadüxü. Rũ guxũma ga yema duũxügü rü wüxigu Moĩchémaã natüũgu nixĩxütanü. Rũ yexgumarüũ ta Moĩchémaã nawa nichoũ ga yema Taxtü ga Dauchiüxũ.

<sup>2</sup> Rũ guxũma ga yema duũxügü rü yexguma wüxigu Moĩchémaã yema caixanexũpechitatüũgu yaxĩxütanügu rü yema Taxtü ga Dauchiüxüwa yachoũgu, rü yemaãcü nügü nangoxēēgü na Moĩchéweama naxĩxũ.

<sup>3</sup> Rũ yexgumarüũ ta ga guxũma ga yema duũxügü nanangõxgü ga yema pãu ga daxüwa rüyixũ.

<sup>4</sup> Rũ guxũma ga yema duũxügü nayaxaxgü ga yema dexá ga Cristu nüxna ãxũ. Yerü Cristu rü yema duũxügüxũ ínixümücü ga yema ínaxĩxüwa, rü nüxna nanaxã ga yema dexá ga yaxaxgüxũ.

<sup>5</sup> Natürü narümumaẽ ga yema duũxügü ga tama Tupanaãrũ ngúchaũ ügüxũ. Rũ yemacèx

ga yema duūxūgū rü yexma nayue rü yéma nawogū ga naxūnegū ga dauxchitawa ga taxúema íxāpataxūwa.

<sup>6</sup> Rū guxūma ga yema nangupetū na tórū cuèxruū yīxūcè rü tama tórū oxigürūxū chixexūcèxama idaugūxūcèx.

<sup>7</sup> Rū ngēmacèx tama name i nūxū picuèxūgū i tacū rü tupananchicūnèxāgū, yexgumarūū ga ñuxre ga nūmagū naxūgūxūrūū. Erū Tupanaārū ore i ūmatūxūwa rü tórū oxigūchigaxū nixu rü ñanagürū:

“Rū duūxūgū ínarütogū na nachibüexūcèx rü na naxaxegūxūcèx, rü ngēmawena rü inachigū na íyayūxexūcèx”,

ñanagürū i ngēma ore.

<sup>8</sup> Rū tama name i yixema rü naĩ i ngemaã itape yexgumarūū ga ñuxre ga nūmagū naxūgūxūrūū. Rū yemacèx wūxitama ga ngunexūgu rü nayue ga 23,000.

<sup>9</sup> Rū tama name i nūxū taxū ya tórū Cori na ñuxācū yaxna tamaã naxīnūxū yexgumarūū ga ñuxre ga nūmagū naxūgūxūrūū. Rū yemacèx nixī ga yema duūxūgūxū nangōxcuxū ga āxtapegū rü nayuexū.

<sup>10</sup> Rū tama name i chixexū Tupanamaã pixugū yema ñuxre ga nuxcūmaūgūxū ga tórū oxigürūū. Rū yemacèx ga Tupanaārū orearū ngerūū ga daxūcūāx rü nanadai.

<sup>11</sup> Rū guxūma ga yema nuxcūmaxūgūxū ga duūxūgūxū ngupetūxū, rü ñomaxūcūū rü tórū cuèxruū nixī. Rū naxūmatū na ngēmawa nūxū icuáxūcèx na ñuxācū Tupana naxwèxexū na imaxēxū i yixema i ñomaūcūū.

<sup>12</sup> Rū ngēmacèx ya yíxema tūgūgu rüxīnūxē na

taporaxū i Tupanapēxewa, rü name nixĩ na meã tügüna tadauxū na tama chixexūgu tanguxücèx.

13 Rü ñuxma rü ta taguma pexcèx ínangu i ngúchaxū i chixexū i taxucürüwama namaã yaxna pexĩnüexū. Rü name nixĩ i Tupanana perüyoŭ erü nüma rü aixcüma nayanguxêẽ i ngema tamaã inaxunetaxū rü taxūtáma nawa pexū nawogü i ngúchaxūgü i taxucürüwama yaxna namaã pexĩnüexū. Natürü ngexguma tá ngúchaxūgü i chixexū pexcèx ínguxgu rü nüma rü tá pexū ínapoxū na tama nagu peyixücèx.

14 Rü ngēmacèx, Pa Chaueneēgü ya Pexū Changechaūgüxex, jrü nüxū perüxoe i ngema nacümagü i tupananetachicünèxāgücèx naxūgüxū i ngema duūxūgü i tama yaxōgüxū!

15 Pemaã nüxū chixu i ngēma ore, erü chauxcèx rü duūxūgü i nüxū cuáxū pixīgü. Rü pema tátama nagu perüxĩnüẽ i ngēma pemaã nüxū chixuxū.

16 Rü ngēxguma õna i üünexücèx ingutaquēxegügu, rü yaxaxgügu ya yima binu ya üünecü rü moxē naxcèx ixāgügu, rü ngēmaãcü yigü tangoxēẽ na Cristu ya taxcèx nagü ibacüwe rüxĩxū. Rü ngēxguma nangōxgügu i ngēma pāũ i ibücuxū, rü ngēmaãcü yigü tangoxēẽ na Cristu ya taxcèx naxūne ixācüwe rüxĩxū.

17 Rü woo na imuxū i yixema, natürü wüxitama i pāũ tangōxgü. Rü ngēmaãcü nixĩ i wüxitama ixīgüxū erü wüxiwetama tarüxĩ.

18 jrü dücax i ngēma Yudíugü i nangōxgüxū i ngēma naxūnamachi i Tupanacèx nadèixū! Rü ngēxguma wüxigu nügümaã nangōxgüãgu, rü guxūma i ngēma nangōxgüxū rü ngēmaãcü nügü nangoxēẽ na wüxigu Tupanawe naxĩxū.

19 Rū ñuxma na ngẽma ñachaxũ, rü tama chanaxwèxe i nagu perüxĩnũẽ na naxüünexũ i ngẽma namachi i ngẽma duũxügü i tama yaxõgüxũ norü tupananetachicünèxãcèx dèixũ. Rü tama chanaxwèxe i nagu perüxĩnũẽ na tacüwa namexũ i ngẽma norü tupananetachicünèxãgü, erü nangearü maxũãx.

20 Natürü pemaã nüxũ chixu rü ngẽxguma ngẽma duũxügü i tama Tupanaxũ cuèxgüxũ, norü tupananetachicünèxãcèx nadaiãgu i tacü rü naxüna, rü tama Tupanacèx nixĩ i nadaiãxũ, natürü ngoxogücèx nixĩ i nadaiãxũ. Rü tama chanaxwèxe i ngoxogütanüxüxũ pegü pixĩgüxẽẽ.

21 Rü pema na peyaxaxgüxũ ya yima binu ya tórü Corixũ namaã picuèxüügücü rü taxucürüwama namaã pexãmücü i ngẽma duũxügü i Chatanáwe rüixũ. Rü pema na tórü Coriarü mechawa penangõxũ i ngẽma õna i nüxũ namaã picuèxüügüxũ rü taxucürüwama ngẽma duũxügü i Chatanáwe rüixũãrü mechawa peyachibüe.

22 ¿Rü ñuxũ ñapegüxũ i ñuxmax? ¿Éxna penanuxẽẽchaũ ya tórü Cori? ¿Éxna pexcèx rü nüxũ tarüporamaẽgü i yixemax?

*Name nixĩ i taeneẽarü mexüc èx tadaugü rü tama i tóxrütama*

23 Pema rü ñaperügügü:

“Marü name na tanaxüxũ i tacü i tanaxwèxegüxũ”, ñaperügügü. Rü aixcüma nixĩ i ngẽma, natürü tama tüxũ name i guxüma i ngẽma ixüxchaũxũ. Rü ngẽmáãcü Cristu tüxũ ínanguxüxẽẽ na naxüxücèx i ngẽma inaxwèxexũ, natürü tama



guxūma i ngēma ixūxū tūxū narūngūxēē na yexeraācū meā yaxōgūamachigūxūcèx.

<sup>24</sup> Rū tama name nixī i tóxrūtama mexūcèx tadaugū, natürü name nixī i togūarū mexūcèx tadaugū.

<sup>25</sup> Rū marū name i penangōx i nagūxūraūxū i namachi i namaā nataxegūxū, natürü taxucèxma tūxcūū naxcèx ípeca ngoxi marū tupananetagūxū namaā yacuèxūxūgūxū i namachi yixī.

<sup>26</sup> Erū ñoma i naāne rü guxūma i nawa ngēxmaxū, rü tórü Cori ya Tupanaarū nixī.

<sup>27</sup> Rū ngēxguma chi wūxi i duūxū i tama yaxōxū pexna uxgu na naxūtawa peyachibüexūcèx, rü chi ngēma pexīxgu, rü marū name i penangōx i guxūma i ōna i pepēxegu yaxūxūchixū. Rū taxucèxma tūxcūū naxcèx pexoegaāē rü nūxna peca na ngextá ne naxūxū i ngēma namachi i pemaā nangōxū.

<sup>28</sup> Natürü ngürüāchi wūxie tá pemaā nūxū tixu rü ñatarügü:

“Ñaā namachi rü tupananetachicünèxācèx yamèxgūxū i naxūnawa ne ūxū nixī”, ñatarügü. Rū ngēxguma i pema rü tama name na penangōxū i ngēma namachi na tama chixexūgu tūxū penguxēēxūcèx ya yíxema pemaā nūxū ixuxe, rü tama ngēmacèx taxoegaāēxūcèx i tūmax.

<sup>29</sup> Rū tama pechiga nixī i chidexaxū i ngēxguma: “Na tama taxoegaāēxūcèx”, ñachagu. Natürü yíxema pemaā nūxū ixuxechiga nixī i chidexaxū. Natürü bexmana ngürüāchi wūxi i yaxōxū tá cuxna naca rü ñanagürü tá cuxū:

“¿Tūxcūū i togū naxcèx oegaāēxūgagu choxna cunachuxu na tama chanaxūxū i tacū

i chanaxwèxexŭ?

<sup>30</sup> Rŭ ngēxguma chi Tupanana moxē chaxāxgu naxcèx i ngēma òna i changōxŭ, ģrŭ tŭxcŭŭ i ngēma ònacèx choxŭ quixu?” ñanagŭrŭ.

<sup>31</sup> Dŭcèx, pemaã nŭxŭ chixu rŭ name nixī i guxŭma i ngēma pexŭxŭmaã Tupanaxŭ picuèxŭxŭgŭ. Rŭ ngexguma tacŭ pengoxgŭgu rŭ exna tacŭ pixaxgŭgu rŭ ěxna tacŭ i to pexŭgŭgu, rŭ name nixī i ngēmamaã Tupanaxŭ picuèxŭxŭgŭ.

<sup>32</sup> Rŭ tama name i penaxŭ i tacŭ i togŭxŭ chixexŭgu yixēèxŭ, rŭ woo Yudŭgŭ yixŭgŭgu rŭ ěxna tama Yudŭgŭ yixŭgŭgu, rŭ ěxna yaxōgŭxŭ yixŭgŭgu.

<sup>33</sup> Rŭ choma rŭ guxŭwama guxŭxŭma chataãèxēèchaxŭ. Rŭ ngemacèx tama chanaxŭ i ngema chomatama namaã chataãèxŭ, natŭrŭ chanaxŭ i ngema togŭ namaã taãèxŭ na ngemaãcŭ nŭmagŭ rŭ ta nuxŭ nangŭchaxŭ na yaxōgŭãxŭ rŭ nayauxgŭãxŭ i maxŭ i taguma gŭxŭ.

## 11

<sup>1</sup> Rŭ name nixī i nagu pexī i chaucŭma ngēxgumarŭŭ i choma na Cristucŭmagu chixŭxŭrŭŭ.

*Name nixī i ngexŭgŭ rŭ mexŭ i nacŭmagu naxī*

<sup>2</sup> Pa Chaueneègŭx, pemaã chataãè erŭ guxŭguma chaugu perŭxŭnŭè rŭ nagu pexī ga yema nguxēètae ga pexŭ changŭexēèxŭ.

<sup>3</sup> Natŭrŭ chanaxwèxe i nŭxŭ pecuèx na Cristu rŭ wŭxichigŭ i yatŭeru na yŭxŭ. Rŭ yatŭxŭgŭ rŭ naxmèxèru nixŭgŭ ngēxgumarŭŭ ya Tupana rŭ Cristueru na yŭxŭ.

4 Rū ngēmacèx i ngēxguma wūxi ya yatü ngutaquēxewa yumüxēgu rü ēxna Tupanaārü orexü yaxuxgu, rü tama ínangèxüchipatēxegu, rü ngēma rü wūxi i chixexü nixī i Cristupēxewa naxüxü.

5 Natürü ngēxguma chi wūxi i ngecü ngutaquēxewa yumüxēgu rü ēxna Tupanaārü orexü yaxuxgu, rü chi tama ngīgü natüerugu, rü ngēma rü wūxi i chixexü nixī i ngītepēxewa naxüxü. Rū ñoma ngīgü yadüeruxürü iyixī.

6 Erü ngēxguma chi tama ngīgü natüeruchaügu, rü narümemaē nixī i noxtacüma ngīgü ibèixeru. Natürü ngēxguma chi wūxi i ngīrü āne yixīgu i ngēma na ngīgü nabèixeruxü rü ēxna ngīgü yadüeruxü, rü narümemaē nixī i ngīgü itüeru.

7 Natürü yatügü rü tama name na nügü natüerugüxü. Yerü ga Tupana rü nügüraüácü nanaxü ga yatü rü Tupanachipeta nixī. Rü yima yatüwa nixī i nangóxü na ñuxácü namexēchixü ya Tupana. Rü ngēma ngecüwa nixī i nangóxü na ñuxácü namexü ya yatü.

8 Yerü yexguma noxri Tupana naxüxgu ga yatü, rü tama ngecüwa nixī ga naxüāxü. Rü ngīma waxi nixī ga yatüwa ngīxü naxüxü.

9 Rü yatücèx nixī ga Tupana ngīxü üxü ga ngecü, rü tama ngecüçèx nixī ga Tupana naxüxü ga yatü.

10 Rū ngēmacèx name nixī i ngīgü itüeru na duüxügüpēxewa rü Tupanaārü orearü ngeruügu i daxüçüāxgüpēxewa nangóxüçèx na ngītemēxēwa nangēxmaxü.

11 Natürü Tupanapēxewa rü taxuüma nixī ya yatü ega natauxgu i ngecü. Rū ngēxgumarüü ta i ngecü rü taxuüma iyixī ega natauxguma ya yatü.

12 Yerü yexguma noxri Tupana ngĩxũ üxgu ga ngecü, rü yatüwa nixĩ ga ngĩxũ naxũxũ. Rü ngẽxgumarũ ta ya yatü rü ngecüwa nixĩ i nabuxũ. Natürü Tupana nixĩ ya naxücü i guxũma i duũxũgü.

13 Rü pematama tá penangugü rü ngoxi name na wüxi i ngecü rü tama ngĩgü natüeruãcüma nayumüxẽxũ.

14 Rü woetama tórü bucüma nixĩ i nüxũ na icuáxũ na wüxi i ãne yĩxũ na nügü namèxyaexẽxũ i wüxi i yatüxũ.

15 Natürü ngeçücèx rü wüxi i mexèchixũ nixĩ na namèxyaexũ. Erü Tupana rü ngĩxna nanaxã i ngĩyae na ngẽmamaã ngĩgü natüeruxücèx.

16 Natürü ngẽxguma chi texé ngẽmachiga tügü choxũgagügu, rü name nixĩ i nüxũ tacuèx na ngẽmatama yĩxũ i tacüma rü nacüma i guxũma i yaxõgüxũ i guxũnema ya tupaucagüwa.

*Duũxũgü rü chixri namaã inacuèxgü ga Coriarü òna i üünexũ*

17 Rü ñuxma i ñaã popera i pexcèx chaxümatüxũwa rü pemaã nüxũ chixu rü nangèxma i wüxi i pecüma i chixexũ i tama namaã chataãèxũ. Erü chauxcèx i ngẽma perü ngutaquèxegü rü pexũ nachixexẽ, rü tama aixcüma perü meruũgü nixĩ.

18 Erü duũxũgü chomaã nüxũ nixugügü rü ngẽxguma tórü Coricèx pengutaquèxegüũxgu rü pegü pitoye. Rü ngãxũgu chayaxõ na aixcüma yĩxũ i ngẽma nüxũ yaxugügüxũ.

19 Choma rü nüxũ chacuèx na aixcüma woe tátama yĩxũ i pegü pitoyexũ na ngẽmawa nüxũ

icuáxúcèx na texégü tĩxũ ya yíxema aixcūma Cristuarü duũxũgü ixĩgũxe.

20 Rũ ngẽma pegü na pitoyexũgagu nixĩ na tama aixcūma tórü Corixũ picuèxüũgüãcūma yĩxũ i penangõxũ i tórü Coriarü õna i Üünexũ i ngẽxguma pengutaquẽxegüũxgu.

21 Erü ngẽxguma penangõxgu i ngẽma õna i Üünexũ rü wüxichigü rü peñuxãægü na pexira na penayaxuxúcèx i ngẽma õna. Rũ yoxni i ngẽma togü rü ngẽxma nataiyae, rü togü rü nayaxaxgü ya binu ñuxmata nangãxẽ.

22 ¿Éxna pengechiũgü ecèx tama ngema pechibüexũ rü pexaxegüxũ? ¿Tüxcüũ nüxü pexoe i ngẽma togü i yaxõgüxũ rü penaxãneẽxẽẽ i ngẽma yaxõgüxũ i ngearü ngẽmaxũãxgüxũ? ¿Rü tacüxũ tá pemaã chixu i ñuxmax? ¿Pexcèx rü tá pemaã chataãexũ? Dücèx, pemaã nüxü chixu rü tama pemaã chataã naxcèx i ngẽma pexügüxũ.

### *Tórü Coriarü õna i üünexũchiga*

23 Rũ ngema nguxẽẽtae i pemaã nüxü chixuxũ rü tórü Corixũtawatama chanayaxu. Rũ yexguma tórü Cori ga Ngechuchuxũ ínaxuaxũgu, rü yematama chütaxũgu rü nūma rü nanayaxu ga wüxi ga pãũ.

24 Rũ Tupanana moxẽ naxã, rü yemawena rü inanabücu, rü ñanagürü:

“Ñãã nixĩ i chaxune i pexcèx ichaxãxũchiga. ;Rũ penangõ i ñãã pãũ na ngẽmaãcü peãewa choxna pecuèxãchiexúcèx!” ñanagürü.

25 Rû yexgumarüü ta ga chibüwena rû Ngechuchu nanayaxu ga wüxi ga pochiyu ga binuchiümaã äãcuxü, rû ñanagürü:

“Rû daa binu rû wüxi i cuèxruü nixĩ na ngexwacèx Tupana duüxügümaã ixunetaxü i maxü i taguma gúxüchiga. Rû chaugü ya pexcèx ibacümaã nixĩ i Tupana pexü nüxü cuèxëëxü i ngëmachiga. Rû ngëxguma ñuxguacü daa binu pixaxgügu rû ñuxma choma na chanaxüxürüü tá penaxü na peãëwa choxna pecuèxãchiexücèx”, ñanagürü ga Ngechuchu.

26 Rû guxügüma i ngëxguma penangõxgu i ñaã pãü rû peyaxaxgügu ya daa binu rû ngëmawa tá duüxügüxü nüxü picuèxëë na ñuxãcü tórü peca-ducèx nayuxü ga tórü Cori. Rû ngëmaãcü tá penaxü ñuxmatáta wena nataegu i nümax.

*Texegücèx nixĩ i tórü Coriarü õna i üünexü*

27 Natürü ngëxguma chi texe tama tügü tamexëëarü maxüãcüma nangõxgu i Coriarü pãü i üünexü rû tayaxaxüxgu ya yima binu ya üünecü, rû pecadu taxü napewa ya tórü Cori ya taxcèx yucü rû nagü ibacü.

28 Rû ngëmacèx naxüpa na tanangõxü i ngëma pãü rû na tayaxaxüxü ya yima binu, rû name nixĩ i wüxichigü meã tümaarü maxügu tarüxĩnü ngoxi nataxuma i tacü rû chixexü i tümaarü maxüwa.

29 Erü ngëxguma tama tügü tamaxëëarü maxüãcüma tanangõxgu rû tayaxaxüxgu, rû tügütama poxcuwa taga. Erü tama aixcüma tayaxõ na tórü Corichiga yixixü i ngema pãü rû yima binu..

<sup>30</sup> Rū ngēmacèx nixī i muxūchixe i petanūwa rū pidaaweexū rū peturaexū, rū ñuxre i togū rū marū nayuexū.

<sup>31</sup> Natürü ngēxguma chi tórütama maxūgu rüxīnūegu naxūpa na nangōxū i ngēma Coriarü ñna, rū nūma rū taxucèx tūxū napoxcue.

<sup>32</sup> Natürü ngēxguma tórü Cori ñoma i tórü maxūwa tūxū poxcugu, rū ngēmaācū tūxū inayarūwēxāchixēē na tama yixcūra naāneārü guxgu tūxū napoxcuxūcèx wūxigu namaā i ngēma duūxūgū i tama yaxōgūxū.

<sup>33</sup> Rū ngēmacèx, Pa Chaueneēgūx, ngēxguma pengutaquēxegūgu na penangōxūcèx i ngēma ñna i ūūnexū, name nixī i pegū ípenanguxēē na guxāma wūxigu meā penangōxūcèx.

<sup>34</sup> Rū ngēxguma chi texé taiyèxgu, rū name nixī i tūmapatawatama tachibū na tama Tupana pexū poxcuexūcèx naxcèx na chixexū pexūexū i perü ngutaquēxegūwa. Rū ngēma to i guxchaxūgū i pexū ngēxmaxū, rū choma tá chanamexēē i ngēxguma petanūwa chaxūxgu.

## 12

### *Ngēma cuèx i Tupanaāē i Ūūnexū tūxna āxūchiga*

<sup>1</sup> Pa Chaueneēgūx, chanaxwèxe i nūxū pecuèx na ñuxācū yīxū i ngēma cuèx rū ñuxacū na yixīxū i ngema tauxcha i Tupanaāē i Ūūnexū tūxna āxū. Rū ngēmachiga nixī i pemaā nūxū chixuxchaūxū i ñuxmax.

<sup>2</sup> Rū pema meāma nūxū pecuèx ga yexguma tauta Cristuaxū peyaxōgūgu, rū pegū nūxna

peḡāgū ga tupanānetachicūnēxāgū ga tama idexaxū.

<sup>3</sup> Rū ngēmācēx i űuxma rū chanaxwēxe i meā nūxū pecuēx rū taxucūrūwama texe ya Tupanaāē i Ūūnexū tūmawa ngexmaxe rū chixri Ngechuchuga tidexa. Rū ngexgumarūxū ta rū taxucūrūwama texe ngūrūmare tūechama rū:

“Ngechuchu rū tōrū Cori nixī”, űatarūgū ega tama Tupanaāē i Ūūnexū tūxū mūxgu na ngēmācū tidexaxūcēx.

<sup>4</sup> Rū nūma ya Tupana rū duūxūgūna nanaxā i naguxūraū i tauchagū. Natūrū ngema Naāxē i Ūūnexū i nawa ne naxīxū i ngema tauchagū rū wūxitama nixī.

<sup>5</sup> Nangēxma i nagūxūraūxū i Tupanaarū puracū, natūrū yima tōrū Cori ya tūxna naxācū i ngema puracūgū rū wūxitama nixī..

<sup>6</sup> Rū Tupanaarū pora rū nagūxūraūācū nangox. Natūrū wūxitama nixī ya yima Tanatū ya tawa gūxūraūācū nangoxēēcū i ngema norū puracū.

<sup>7</sup> Rū ngema Naāē i Ūūnexū wūxixewachigū nanangoxēē i Tupanaarū pora i norū duūxūgūtanūwa na ngemaācū gūxāarū ngūxēēruū yixīxūcēx.

<sup>8</sup> Rū Naāē i Ūūnexū rū tūmāxena rū nanaxā i taucha na ucuēxū tacuāxūcēx. Rū ngēmatama Naāē i Ūūnexū rū togeāxū rū nanatauxchaxēē na nūxū tacuāxū na mea tangūexēētaexū i Tupanaarū ore.

<sup>9</sup> Rū toge rū ngēmatama Naāē i Ūūnexū tūxū nanatauxchaxēē na Tupanana tarūyoexūcēx. Rū toge rū tūxna nanaxā i pora na ngēmamaā naxcēx tayataanegūxēēxūcēx i ngēma idāaweexū.



10 Rū togue rū tūxna nanaxã i pora na tanaxūxūcèx i mexūgū i Tupanaārū poramaã ūxū. Rū togue rū tūxū nanatauxchaēē na nūxū tixuxūcèx i Tupanaārū ore. Rū togue rū tūxna nanaxã i cuèx na nūxū tacuáxūcèx i tacū yīxū i ngoxogüarū ixīxū rū tacū yīxū i Tupanaãē i Üünexūārū ixīxū. Rū togue rū tūxna nanaxã i tauxcha na ngēma tama nūxū tacuáxū i nagawa tidexaxūcèx. Rū togue rū tūxna nanaxã i cuèx na tanangoxēēxūcèx na tacūchiga yīxū na tidexaxū ya yíxema to i nagawa idexáxe.

11 Rū guxūma i ngēma rū Tupanaãē i Üünexūtama nixī i naxūxū. Rū nūma nixī i wūxichigū i duūxūna naxāāxū i ngēma cuèx i nūma nanaxwèxexū na nūxna naxāāxū.

*Guxãma i yaxōgūxū rū wūxitama i naxūnewa naxūgū*

12 Rū duūxūxūne rū woo muxūgu nixūye, natürū wūxitama i naxūne nixī. Rū ngexgumarūxū ta i ngema Cristuāxū yaxōgūxū rū woo namu, natürū wūxitama i naxūnewa naxūgū.

13 Rū yexguma íbaiūgu rū Tupanaãē i Üünexū rū wūxitama i naxūne tūxū nixīgūxēē. Rū woo Yudíugū na ixīgūxū, rū ēxna tama Yudíugū na ixīgūxū, rū woo togümēxēwa ingexmagūxū rū ēxna taxúxemēxēwa ingēxmagūxū, natürū wūxitama i naxūne tūxū nixīgūxēē i nūma i Naãē i Üünexū i nūxicatama ixīxū. Rū guxãma i yixema rū marū tūxna nangu i ngēma Naãē i Üünexū.

14 Wūxi i naxūne rū tama naxāmenāxamare, natürū muxūgu nixūye.

15 Rū ngēxguma chi yima nacutū ñaxgu:

“Rū ñuxma na tama naxmēx chiixũ, rū ngēmacēx tama ngēma naxũnewa changēxma”, ñaxgu, rū tama ngēmacēx nuxũ narũxo na ngema naxũnewa nangexmaxũ.

16 Rū ngēxguma chi yima naxpaxchinũ ñaxgu:

“Rū ñuxma na tama naxētũ chiixũ, rū ngēmacēx tama naxũnewa changēxma”, ñaxgu, rū tama ngēmacēx nuxũ narũxo na ngema naxũnewa nangexmaxũ.

17 Rū ngēxguma chi guxũma i naxũne rū naxētũ yixĩgu, ħrũ tacũmaã chi i nuxũ naxĩnuxũ i ngema naxũne? Rū ngēxguma chi guxũma i naxũne rū naxmachixē yixĩgu, ħrũ tacũmaã chi i nuxũ nawãxĩxũ?

18 Natürũ Tupana ga naxúcũ ga taxũne, rū ngexta nüma ínanaxwēxexũwa nanangexmaxēẽ i taeru rū tachacüügũ rū taparagũ.

19 Rū ngēxguma chi nataxuxgu i norũ üyechigũ i taxũne rū chi naxāmenēxāmare.

20 Rū ngema naxũne rū woo muxũgu nixüye, natürũ wüxitama i naxũne nixĩ.

21 Rū taxetũ rū taxucürũwa taxmēxũ ñanagürũ:

“Choma rū tama chacuxwēxe”, ñanagürũ. Rū ngēxgumarũ ta i taeru rū taxucürũwa tacutügũxũ ñanagürũ:

“Choma rū tama chapexwēxe”, ñanagürũ.

22 Natürũ ngēma yexeraãcũ ãücũmaxũ i taxũnewa, rū ngēma nixĩ i yexera nanaxwēxexũ i taxũne.

23 Rū ngēma taxũnewa yexeraãcũ naxcēx ixānexũ, rū ngēma nixĩ i yexera meã ixüxchiruxũ. Rū ngēma taxũnewa ngēxmaxũ i tama inaxwēxexũ na nangóxũ, rū ngēma nixĩ i yexera meã idüxũxũ.

24 Natürü tama ngēmaācū tanaxū namaā i ngēma taxūnewa ngēxmaxū i guxāxūma iwéxū. Rū ngēmaācū Tupana nanaxū i taxūne, na yexeraācū nūxna idauxūcèx i ngēma yexera naxcèx ixānexū.

25 Rū ngēmaācū Tupana nanaxū i taxūne na wūxichigū i norū üye nūgūgu naxīnūexūcèx rū nūgū nangūxēēgūxūcèx.

26 Rū ngēxguma chi wūxi i ngēma taxūnearū üye nūxū ngūxgux, rū guxūma i ngēma togū i natanūxūgū rū ta nūxū nangux. Rū ngēxguma chi wūxi i ngēma taxūnearū üye taāēxgu, rū guxūma i ngēma togū i natanūxūgū rū ta nataāēgū.

27 Rū ñuxma i wūxichigū i pema rū Cristuxūnearū üye pixīgū, rū ngema naxūnewa pexūgū.

28 Rū ngēmacèx ya Tupana rū nanaxwae na ñaacū nūgū inanuxū i norū duūxūgū: Rū yīxema tūxira tūxū naxunetagūxe tixī ya norū puracūwa tūxū namugūxe. Rū tūxū naxuneta ya togegū na nūxū tixugūxūcèx i norū ore. Rū tūxū naxuneta ya togegū na duūxūgūxū tangūxēēxūcèx i norū ore, rū togegū na tanaxūgūxūcèx i mexūgū i Tupanaārū poramaā taxūgūxū. Rū togegū rū tūxū nanatauxchaxēē na tanameexēēxūcèx i idaaweexū, rū togegū na nūxū tarūngūxēēgūxūcèx i ngema tacū nūxū taxuxū, rū togegū yaxōgūxūārū āēxgacūgū na tixīgūxūcèx. Rū tūxū nanatauchaxēē ya togegū na ngēma naga i tama nūxū tacuāxūwa tidexagūxūcèx.

29 Rū tama guxāma Tupana tūxū imugūxe tixīgū, rū tama guxāma Tupanaārū orearū uruū tixīgū. Rū tama guxāma norū orewa ngūxēētaegūxe tixīgū,

rū tama guxāma nūxū tacuèx na tanaxūxū i mexūgū i taxūgū i Tupanaārū poramaã üxū.

<sup>30</sup> Rū tama guxāma nūxū tacuèx na tanameēxēēxū i duūxūgū i idaaweexū. Rū tama guxāma nūxū tacuèx na nawa tidexagūxū i wūxi i naga i tama nūxū tacuáxū. Rū tama guxāma nūxū tacuèx na tanangoxēēxū na tacūchiga yadexaxū i ngēma duūxūgū i tama nūxū nacuáxū i nagawa idexaxū.

<sup>31</sup> Rū name nixī inaxcèx pedèux na Tupana pexna naxāxūcèx i ngēma cuèx rū tauxchagū i rümemaegūxū.

### *Yigū na ingechaūgūxūchiga*

Natürü i ñuxma rū tá pexū changúexēē i tacū nixī i guxūma i ngēma pemaã nūxū chixuxūārū yexera rümemaēxū.

## 13

<sup>1</sup> Rū woo togū i nagawa chideaxgu, rū woo Tupanaārū orearū ngeruūgū i daxūcūāxgawa chideaxgu, natürü ñoma wūxi i tacū i āgaxūrūūmare chixī ega tama guxāxū changechaūgu.

<sup>2</sup> Rū woo nūxū chacuèxgu na meã duūxūgūmaã nūxū chixuxū i Tupanaārū ore, rū woo nūxū chacuèxgu i guxūma i tacū i ēxūguxū i Tupanachiga, rū woo choxū natauxchagu na chorū ōmaã chayaxīgachixēēxū ya mēxpūnegū, natürü taxuwama chame ega tama guxāxū changechaūgu.

<sup>3</sup> Rū woo ngēma duūxūgū i ngearū dīeruāxgūxūxū chayanuxgu i guxūma i tacū

i choxū ngēxmaxū, rü woo Tupanaärü orecèx chaugü ichaxāxgu na üxüwa choxū yagugüxcèx, rü taxuwama choxū name i ngēma ega tama guxāxū changechaūgu.

<sup>4</sup> Rü yíxema guxāxū ngechaūxē, rü yaxna namaā taxīnū, rü namaā tamedüma. Rü tama tixāüxāchiwèxe, rü tama togüxū tügü tarüyexera rü tama tügü ticuèxū.

<sup>5</sup> Rü yíxema aixcüma guxāxū ngechaūxē, rü tama taguxchigawèxe, rü tama tügüguxicatama tarüxīnū, rü tama tanuxwèxe, rü tama nagu tarüxīnūēcha ega texé chixexū tümamaā üxgu.

<sup>6</sup> Rü tama namaā tataāē i chixexūgü, natürü namaā tataāē i ngēma ore i aixcüma ixīxū.

<sup>7</sup> Rü yíxema aixcüma guxāxū ngechaūxē, rü yaxna namaā taxīnū, rü guxūguma nüxū tayaxō, rü guxūguma mexūgu namaā tarüxīnū, rü taguma naxchi taxai woo tacü tümamaā naxūxgu i togü.

<sup>8</sup> Rü ngēma yigü na ingechaūxū rü tagutáma inayacuèx. Natürü ngēma na nüxū ixuxū i Tupanaärü ore rü wüxi i ngunexūgu tá inayacuèx. Rü ngēma tama nüxū icuáxū i nagawa na idexaxū, rü tá ta inayacuèx. Rü ngēma ñuxma nüxū icuáxū rü wüxi i ngunexūgu rü marü taxuwatáma tüxū name.

<sup>9</sup> Erü ngēma tórü cuèx i ñuxma tüxū ngēxmaxū, rü Tupanapēxewa rü naxíra. Rü ngēxgumarū ta i ngēma norü orexū na ixuxū, rü wüxi i íramarexūtama nixī.

<sup>10</sup> Rü guxūma i ngēma rü tá inayarüxo i ngēxguma Tupanapēxewa ingugügu rü nüma tá guxūxūma tüxū nacuèxēēgu.

<sup>11</sup> Yexguma chabuxgu ga chomax, rü wüxi ga

buxürüü chidexa, rü buxü nagu rüxñüxügu charüxñü, rü tama meã chauãëxü chacuèx. Natürü yexguma marü chayèxgu, rü nüxü charüxo ga guxüma ga yema chorü bucüma.

<sup>12</sup> Rü ngëma ñuxma nüxü idauxü i Tupanachiga, rü ñoma wüxi i worua ya üxachametüxewa yigü idauxürüü nixĩ na taxcèx naxëxü. Natürü yixcúra rü tá aixcüma meã nüxüxüchi tadau ya Tupana. Rü ñuxma rü írarüwatama nüxü chacuèx i Tupanachiga. Natürü wüxi i ngunexügu rü tá meã nüxü chacuèx i guxüma i nachiga, ngëma na Tupana meãma choxü cuáxürüü.

<sup>13</sup> Rü ñuxma rü nangëxma i tomaëxpüx i nacümagü i guxügutáma ngexmaxü. Rü ñaãgü nixĩ:

1 Rü Tupanaãxü tayaxõgü

2 Rü nüxü ítananguxëë na nataeguxü ya Cristu

3 Rü nüxü tacuèx na tamücüxü ingechaüxü.

Natürü ngëma tomaëxpüxtanüwa rü ngëma rümemaexü nixĩ na guxãxü ingechaüxü.

## 14

*Ngëma tama nüxü icuáxü i nagawa na idexaxüchiga*

<sup>1</sup> ¡Rü naxcèx pedèux na guxãxü pengechaüxü! Rü ngëxgumarüü ta name nixĩ i naxcèx pedau i ngema tauxchagü rü ngema cuèx i Naãë i Üünexüwa ne ìxü. Rü ngëma cuèx i yexeraãcü penaxwaexü nixĩ na pexü natauxchaxü na nüxü pixuxü i Tupanaarü ore.

<sup>2</sup> Yíxema duüxë ya tama nüxü tacuáxü i nagawa idexaxe, rü Tupanamaã nixĩ i tidexaxü rü tama i duüxügümaã, erü taxúema nüxü tacuèx na ñuxü

ñaxũchiga yĩxũ. Rũ Tupanaãẽ i Ûünexũ nixĩ i tũxũ idexaxẽẽxũ, natürũ ngẽma ore i nüxũ tixuxũ rũ ẽxũguxũ nixĩ.

<sup>3</sup> Naturũ yĩxema nüxũ ixuxe i Tupanaarũ ore rũ ngema yaxõgũxũarũ ngũẽẽruxũ tixĩ, erũ yexeraãcũ cuèxwa tanangugũxẽẽ rũ nüxũ tanangúchaxũxẽẽ i ngema ore rũ tanataãẽxẽẽ i ngema yaxõgũxũ i ngexguma guxchaxũ nüxũ üpetũgu.

<sup>4</sup> Rũ yĩxema duũxẽ ya tama nüxũ tacuáxũ i nagawa idexaxe, rũ tũmacèxtama nixĩ i ngema na yexeraãcũ mea Tupanaãxũ tayaxõxũcèx. Natürũ yĩxema nüxũ ixuxe i Tupanaarũ ore rũ nüxũ tixu na yexeraãcũ Tupanaãxũ yaxõgũãxũcèx i guxũma i yaxõgũxũ.

<sup>5</sup> Choma chierũ chanaxwèxe na guxãma i pema rũ ngẽma tama nüxũ pecuáxũ i nagawa na pidexagũxũ. Natürũ yexeraãcũ chanaxwèxe na duũxũgũmaã nüxũ pixuxũ i Tupanaarũ ore. Erũ ngẽma to i nagawa na pidexagũxũarũ yexera narũmemaẽ na togũmaã nüxũ pixuxũ i Tupanaarũ ore. Natürũ ngẽma to i nagawa na idexaxũ, rũ name ega ngẽma yaxõgũxũmaã nüxũ ixuxgu na ãacũchiga yĩxũ i ngẽma dexa, na nũmagũ rũ ta yexeraãcũ meã Tupanaãxũ yaxõgũãxũcèx.

<sup>6</sup> Rũ ngẽmacèx, Pa Chaueneẽgũx, rũ ngẽxguma chi pexũtawa chaxũxgu, rũ chi to i nagawa chideaxgu, ¿rũ ãacũwa chí pexũ namexũ i ngẽma? Natürũ ngẽxguma chi pemaã nüxũ chixuxgu i ngẽma Tupana tũxũ nüxũ cuèxẽẽxũ, rũ ẽxna ngẽma chomatama nüxũ chacuáxũ na aixcũma yĩxũ, rũ ẽxna ngẽma ẽxũguxũ i ñuxma Tupana tũxũ nüxũ cuèxẽẽxũ, rũ ẽxna ãacũ rũ to i nguxẽẽtae i Tu-

panachiga, rü ngēma waxi nixī i pexū mexū.

<sup>7</sup> ¡Rü dücax ngēma paxetaruū i quena rü ēxna arpa! Rü ngēxguma tāū chima texé meā napaūxgu, rü tāū chima nüxū tacuèx na tacūgu tanapaxūxū.

<sup>8</sup> Rü ngēma churaragū, rü ngēxguma norū uwanügümaã nügü nadaixchaūgu, ¿rū ñuxācū tá nügü namexēē na nügü nadèixūcèx ega tama meā nangógagu ya yima corneta ya dèixcèx naxcèx çaxūne?

<sup>9</sup> Rü ngēxgumarūū ta pexū nangupetū. Rü ngēxguma chi perū conūmaã nüxū pixuxgu i dexa i taxúema nüxū cuáxū, ¿rū ñuxācū tá nüxū tacuèx na ñuxū ñaxūchiga yīxū i ngēma nüxū pixuxū? Rü ñoma ngürüanewa pidexagūxürūū tá pixīgū.

<sup>10</sup> Rü aixcūma nixī i namuxū i nagagū i ñoma i nañewa. Rü guxūma i ngēma nagagū rü name naxcèx i ngēma duūxūgū i nawa idexagūxū.

<sup>11</sup> Natürü ngēxguma chi tama nüxū chacuèxgu i ngēma naga i to i duūxū chomaã nawa idexaxū, rü ngēma duūxūcèx rü ñoma to i nachiuñānecūāxrūū chixī, rü chauxcèx rü ñoma to i nachiuñānecūāx i duūxürūū nixī i nümax.

<sup>12</sup> Choma nüxū chacuèx rü pema rü pexū nangúchaū na pexū nangēxmaxū i ngēma nacūmagū i Tupanaãē i Üünexū tüxna āxū. Natürü name nixī i naxcèx pedau na guxūārū yexera pexna naxāāxū i ngēma nacūmagū i namaã nüxū perüngūxēēxū i guxūma i yaxōgūxū na yexeraācū meā Tupanaāxū yaxōgūāxūcèx.

<sup>13</sup> Rü ngēmacèx yíxema duūxē ya taxúema nüxū cuáxū i nagawa idexaxe, rü name nixī i Tupanana naxcèx taca na tüxna naxāāxūcèx i cuèx na togūmaã nüxū tixuxūcèx na ñuxū ñaxūchiga yīxū



i ngēma nūxū tixuxū.

14 Rū ngēxguma chi taxúema nūxū cuáxū i nagawa chayumūxēgu, rü chauãē nixī i ngēma yumūxēxū. Natürü chomatama rü taxuūma chacuèx na tacüchiga yīxū i ngēma.

15 ¿Rü ñuxãcü tá chayumūxēxū i ñuxmax? Rū marü name nixī ega taxúema nūxū cuáxū i nagawa chayumūxēgu, natürü chanaxwèxe i guxāma nūxū cuáxū i nagawa rü ta chayumūxē. Rū marü name nixī ega taxúema nūxū cuáxū i nagawa chawiyaegu, natürü chanaxwèxe i guxāma nūxū cuáxū i nagawa rü ta chawiyae.

16 Erü ngēxguma chi taxúema nūxū cuáxū i nagawa Tupanaxū quicuèxüügu, rü yixema duūxēgü ya ngema irüxĩnūēxē, rü taxucürüwa cumaã wüxigu Tupanaxū ticuèxüügü, erü tama nūxū tacuèx na ñuxū ñaxūchiga yīxū i ngēma nūxū quixuxū.

17 Rū woo ngēma curü yumūxē rü namexēchixgu, natürü yixema duūxēgü ya ngema irüxĩnūēxē rü taxuūma i mexū nawa tayaxu ega to i nagawa quideaxgu.

18 Tupanana moxē chaxã, erü perü yexera taxúema nūxū cuáxū i nagawa chidexa.

19 Natürü woo muxūma i ore i taxúema nūxū cuáxū i nagawa na chidexaxū, natürü ngēma yaxōgūxūãrū ngutaquēxegüwa rü chauxcèx rü narümemaē chi nixī ega woo noxre i ore i meãma nūxū icuáxūwa namaã nūxū chixuxgu i Tupanaãrü ore na ngēmaãcü ngēmamaã meã chanangúexēxūcèx.

20 Pa Chaueneëgüx, tama name i ñoma buxügürüü chixri nagu perüxĩnüe i ngema ore

i pemaã nüxũ chixuxũ. Rũ narũmemae nixĩ i ñoma buxũgũrũxũ pegũ pixĩgũxẽẽ naxchẽxwa i ngema chixexũ, natũrũ ngema peru ñnũwa rũ penaxwẽxe i duũxũgũ i marũ yaxũrũũ mea nagu perũxĩnũe rũ nagu pexĩ i ngema ore i pemaã nüxũ chixuxũ.

<sup>21</sup> Tupanaãrũ ore ga nuxcũmaũxũ ga norũ ore-arũ urũũ ũmatũxũ rũ ñanagũrũ:

“Rũ nuã tá chanamugũ i to i nachiũãnecũãx i duũxũgũ na to i nagawa yadexagũxũcẽx namaã i ñaã Yudũgũ i tama yaxõgũxũ. Natũrũ woo ngẽmaãcũ chanaxũxgu, rũ tãũtãma chauga naxĩnũẽ i ngẽma Yudũgũ i tama irũxĩnũẽchaũxũ”,

ñanagũrũ ga Tupana.

<sup>22</sup> Rũ ngẽmacẽx ngẽma na taxũema nüxũ cuáxũ i nagawa idexaxũ, rũ wũxi i cuẽxruũ nixĩ naxcẽx i ngẽma duũxũgũ i tama irũxĩnũẽchaũxũ. Rũ tama duũxũgũ i marũ yaxõgũxũcẽx nixĩ i ngẽma. Natũrũ ngẽma Tupanaãrũ orexũ na ixuxũ, rũ duũxũgũ i marũ yaxõgũxũcẽx nixĩ na yexeraãcũ meã Tupanaãxũ yaxõgũãxũcẽx. Rũ tama duũxũgũ i tama irũxĩnũẽchaũxũcẽx nixĩ i ngẽma.

<sup>23</sup> Rũ ngẽxguma chi pema i yaxõgũxe pengutaquẽxegũgu, rũ guxã chima to i nagawa pidexagũgu, ¿rũ ñuxũ ñaxũ tá ega petanũgu naxũcuxgu i wũxi i duũxũ i ngema iyarũxĩnũxũ rũ ěxna wũxi i duũxũ i tauta yaxõxũ? ¿Taux ěxna i nagu tá naxĩnũxũ na pexãũãẽgũxũ i pemax?

<sup>24</sup> Natũrũ ngẽxguma chi guxãma i pema nüxũ pixuxgu i Tupanaãrũ ore, rũ chi petanũgu naxũcuxgu i wũxi i duũxũ i tama yaxõxũ rũ ěxna wũxi i duũxũ i ngema iyarũxĩnũxũ, rũ tá nüxũ naxĩnũ i ngẽma Tupanaãrũ ore i nüxũ pixuxũ. Rũ ngẽmaãcũ tá

nūxŭ nacuèx na nūma rŭ wŭxi i pecaduāxŭ na yīxŭ. Rŭ nŭgŭgu tátama Ínarŭxīnŭ i ngēxguma nūxŭ naxīnŭgu i ngēma nūxŭ pixugŭexŭ.

<sup>25</sup> Rŭ ngēma chixexŭ i nūxīcatama nūxŭ nacuáxŭ rŭ tá naxcèx Ínicuèx. Rŭ nūma rŭ ngēxma tá nacaxāpŭxŭ, rŭ tá Tupanaxŭ nicuèxŭ. Rŭ tá nūxŭ nixu na aixcŭma Tupana petanŭwa nangēxmaxŭ.

*Tama name i penaxīxāchiāxēgŭ i perŭ ngutaquewa, rŭ name i meamare penaxŭ*

<sup>26</sup> Dŭcèx, Pa Chaueneēgŭx, ñuxma tá pemaã nūxŭ chixu na ñuxācŭ tá penaxŭxŭ ega ngēxguma pengutaquēxegŭgu. Rŭ ñuxre i pema rŭ marŭ name na Tupanaārŭ wiyaegu pewiyaegŭxŭ, rŭ togue rŭ tanguxēētaegŭxŭ, rŭ togue rŭ nūxŭ tixuxŭ i ngēma ore i Tupana tŭxŭ nūxŭ cuèxēēxŭ, rŭ togue rŭ nawa tidexagŭxŭ i naga i tama nūxŭ tacuèxgŭxŭ, rŭ togue rŭ tanangoxēēgŭxŭ i ngēma dexa i to i nagawa nūxŭ yaxugŭxŭ. Natŭrŭ guxŭma i ngēma rŭ tanaxwèxe i yaxōgŭxŭārŭ ngŭxēēcèx na yīxŭ, na yexeraācŭ yaxōgŭāxŭcèx rŭ meã Tupanacèx namaxēxŭcèx.

<sup>27</sup> Rŭ ngēxguma to i naga i pema tama nūxŭ pecuáxŭwa pidexagŭgu, rŭ name nixī i taxre rŭ ēxna tomaēxpŭxicatama tidexagŭ. Rŭ tanaxwèxe i wŭxiexira tidexa i noxri rŭ yixcama ya togue. Rŭ ngēxguma chi texé to i nagawa ideaxgu, rŭ name nixī na tangēxmaxŭ ya wŭxie ya nūxŭ ixuchigŭxe na ŭacŭchiga yīxŭ i ngēma ore i to i nagawa nūxŭ yaxuxŭ.

<sup>28</sup> Natŭrŭ ngēxguma chi tatauxgu na texé nūxŭ ixuchigŭxŭ na ŭacŭchiga yīxŭ i ngēma ore i to

i nagawa nüxŭ yaxuxŭ, rŭ narŭmemaē nixī na noxtacŭma tama to i nagawa pidexagŭ i perŭ ngutaquēxewa. Rŭ narŭmemaē i wŭxichigŭ tŭxica Tupanamaāxīcatama bexma tidexa.

<sup>29</sup> Rŭ ngēxgumarŭŭ ta ngēxguma pengutaquēxegŭgu, rŭ name nixī i taxre rŭ ēxna tomaēxpŭxīcatama nüxŭ tixu i Tupanaārŭ ore. Rŭ ngēma togŭ i ngutaquēxetanŭxŭ rŭ name nixī na meā nangugŭgŭāxŭ i ngēma ore.

<sup>30</sup> Natŭrŭ ngēxguma chi íyadexayane i wŭxi i duŭxŭ, rŭ Tupana tŭmamaā ídeaxgu ya togue ya ngēma rŭtoxe, rŭ name nixī na iyanachianexŭ i ngēma nüxīra idexaxŭ na tidexaxŭcèx ya yíxema duŭxē ya Tupana tŭmamaā idexaxe.

<sup>31</sup> Rŭ ngēmaācŭ guxāma i pema na Tupana pemaā idexaxŭ, rŭ name nixī i wŭxichigŭ ípenanguxēē na pewa nanguxŭ na pidexagŭxŭ i Tupanaārŭ ore. Rŭ ngēmaācŭ i ngēma togŭ i ngutaquēxetanŭxŭgŭ rŭ tá Tupanachiga meā nangúe rŭ tá nataāēgŭ.

<sup>32</sup> Rŭ ngēmaācŭ tanaxwèxe i meāma tŭmaāēmaā itacuèx ya wŭxichigŭ ya yíxema Tupanaārŭ orexŭ ixuxe.

<sup>33-34</sup> Erŭ perŭ ngutaquēxegŭwa rŭ Tupana nanaxwèxe na meā penaxŭxŭ i guxŭma, rŭ tama nanaxwèxe na ngēma pexāŭgatanŭxŭ rŭ pegŭ ípetŭexēēxŭ. Rŭ guxŭma i togŭ i yaxōgŭxŭārŭ ngutaquēxegŭwa rŭ marŭ nüxŭ nayapue na tama yadexagŭxŭ i ngexŭgŭ. Rŭ name nixī i pema rŭ ta ngēmaācŭ penaxŭ, erŭ nachuxu na yadexagŭxŭ i ngexŭgŭ i ngutaquēxegŭwa. Rŭ name nixī na yatŭgŭga naxīnŭēxŭ i ngexŭgŭ, ngēma Tupanaārŭ ore tŭxŭ muxŭrŭŭ.

<sup>35</sup> Rū ngēxguma chi tacūxū nacuáxchaūgu i wūxi i ngexū, rū name nixī i nachiuwatama natena naca i nachiga i ngēma. Erū wūxi i āne nixī ega ngutaquēxewa yadeaxgu i wūxi i ngexū.

<sup>36</sup> Pa Corītiucūāxgūx, name nixī na nūxna pecuēxāchiexū na tama pewaxira ne naxūxū i Tupanaārū ore. Rū tama pexicatama nixī i penayauxgūxū i ngēma.

<sup>37</sup> Rū ngēxguma chi texé tūgūgu rūxīnūgu na Tupanaārū orearū uruū tīxū rū ēxna tūgūgu tarūxīnūgu na Tupanaāē i Üünexū tūxna naxāxū i tacū rū cuēx, rū name nixī i nūxna tacuēxāchi na tórū Coriarū ore yīxū i ñaā ore i pexcēx chaxūmatūxū.

<sup>38</sup> Natūrū ngēxguma chi texé tama nūxū cuáxchaūgu i ngēma pemaā nūxū chixuxū, rū name nixī i tama tūxū pecuáxchaū.

<sup>39</sup> ;Rū ngēmacēx, Pa Chaueneēgūx, rū Tupanana naxcēx peca i cuēx na meāma nūxū pixuxūcēx i norū ore! ;Rū tama penachuxu na to i nagawa yadexagūxū i duūxūgū!

<sup>40</sup> Rū perū ngutaquēxegūwa, rū name nixī na meā penaxūxū i guxūma. Rū tama name i ngēma pexāūgatanū rū pegū ípetūexēē.

## 15

### *Cristu na yuwa írūdaxūchiga*

<sup>1</sup> Rū ñuxmax, Pa Chaueneēgūx, rū chanaxwēxe i nūxna pecuēxāchie i ngēma Tupanaārū ore i tūxū maxēxēēxū ga pemaā nūxū chixuxū. Rū yematama ore nixī ga pema peyauxgūxū.

Rū ñuxma rü ngēmatama oregagu nixĩ i meã peyaxõgüxũ.

<sup>2</sup> Rū ngēma oregagu nixĩ i pexũ nangēxmaxũ i maxũ i taguma gúxũ, ega aixcúma guxũguma peyaxõgüamagu. Natürü ngēxguma tama guxũguma peyaxõgügu, rü natüçèxmamare nixĩ i ngēma perü õ.

<sup>3</sup> Rū yexguma noxri petanüwa changuxgu, rü yema nüxira pexũ changuxēēxũ nixĩ ga yema chaxira togü choxũ nguxēēxũ na Cristu rü tórü pecaducèx nayuxũ, ngēma Tupanaärü ore i ümatüxüwa nüxũ yaxuxürüũ.

<sup>4</sup> Rū yexgumarüũ ta pexũ changúexēē na ñuxácü inatëxgüãxũ, rü ñuxácü norü tomaēxpüx ga ngunexügu rü wena na namaxüxũ, ngēma Tupanaärü ore i ümatüxüwa nüxũ yaxuxürüũ.

<sup>5</sup> Rū yexgumarüũ ta pexũ changúexēē ga ñuxácü Pedrucèx na nangóxũ ga Cristu, rü ñuxácü yixcüra rü norü ngúexüğü ga yamugüxüçèx na nangóxũ.

<sup>6</sup> Rū yemawena ga Cristu rü noxtacüma 500 arü yexera ga yaxõgüxüçèx nangox. Rü muxüma i ngēma duüxüğü rü ñuxma rü ta namaxē, natürü nümaxũ rü marü nayue.

<sup>7</sup> Rū yemawena rü Chaütiágucèx nangox, rü yixcama guxüma ga yema togü ga ngúexüğüçèx nangox.

<sup>8</sup> Rū düxwa chowa inayacuèx ga chauxcèx rü ta na nangóxũ, woo ngürüãchimare nixĩ ga yema, ngēxgumarüũ i wüxi i buxũ i tautama norü ngunexüwa nanguyane buxürüũ.

<sup>9</sup> Rū choma rü guxüma i ngēma togü i Tupana imugüxütüüwa chaxü. Rü ngemacèx tama name i Tupana imuxümaã choxũ naxugüxũ i duüxüğü,

yerü nawe chingēchigü ga Tupanaârü duïxügü rü poraãcü chixexü chaxü.

<sup>10</sup> Natürü ga Tupana rü chomaã namecüma, rü ngēmacēx i ñuxma rü choxü pedau na tacü chiixü rü ñuxãcü na chiixü. Rü yema chomaã na namecümaxü rü tama natücēxma nixĩ. Yerü choma rü guxü ga togü ga yamugüxüârü yexera chanaxü ga Tupanaârü puracü. Natürü tama chauechama chanaxü ga yema puracü, natürü Tupana ga chomaã mecümacü rü chomaã puracücü nixĩ ga naxücü ga yema puracü na nüxü chixuxüçēx ga norü ore.

<sup>11</sup> Natürü i ñuxma rü nüetama nixĩ ega woo choma chixĩgu rü ēxna togü yixĩgu ga pemaã nüxü ixuxü ga yema ore. Yerü yema ore ga pemaã nüxü tixuxü, rü Tupanaârü ore i tüxü maxēxēxü nixĩ, rü yema nixĩ ga pixōgüxü.

### *Ñuxãcü wena tá namaxē i duïxügü i yuexü*

<sup>12</sup> Marü pemaã nüxü tixu na Cristu rü yuwa ínadxü. ¿Rü tüxcüü ñuxre i pema rü ñaperügügü:

“Yuexü rü tagutáma wena namaxē”, ñaperügügü?

<sup>13</sup> Rü ngēxguma chi ngēma yuexü rü tagu chima wena namaxēgu rü yima Cristu rü tãü chima wena namaxü.

<sup>14</sup> Rü yexguma chi Cristu tama wena maïxgu, rü ngēma ore i nüxü tixuxü i nachiga rü taxuwa chima name, rü natücēxmamare chi nixĩ i perü õ.

<sup>15</sup> Rü ngēxguma chi ngēmaãcü yixĩgu, rü toma i Tupanaârü orearü uruügü rü doratēēxgüxü tixĩgü. Erü nüxü tixu na Tupana Cristuxü wena maxēēxü. Rü ngēxguma chi tama aixcüma yixĩgu na wena

namaxēxū i yuexū, rü chi wüxi i doramare nixī na Tupana Cristuxū wena maxēēxū.

16 Rū ngēxguma chi ngēma yuexū rü tagu chima wena namaxēgu, rü ga Cristu rü chi ta tāū chima wena namaxū.

17 Rū yexguma chi Cristu tama wena maūxgu, rü natüçēxmamare chi nixī i peyaxōgūxū, rü ñuxma rü chi ta perü pecadugagu ipeyarūtauxe.

18 Rū chi ngēmaācū yixīgu rü ngēma duūxūgü i Cristuaxū yaxōgūxū i marü yuexū, rü chi ta tāū chima nüxū nangēxma i maxū i taguma gūxū.

19 Rū ngēxguma chi ñoma i maxūçēxicatama yixīgu na Cristuaxū yaxōgūxū, rü chi guxū i togū i duūxūgūarü yexera tangechaütümūgū.

20 Natürü aixcūmaxūchi nixī ga Cristu ga yuwa na ínadaxū. Natanüwa i guxūma i ngēma yuexū i yixcūra tá írüdagūxū, rü Cristu nixī ga namaā inaxügücü na ínadaxū, yerü nüma nixī ga nüxīra wena namaxūxū.

21 Rū yexgumarūū wüxi ga yatūgagu na nayuexū ga duūxūgü, rü ngēxgumarūū tá ta nixī na wüxi i yatūgagu wena namaxēxū i ngēma marü yuexū.

22 Rū ngema na Adáūgagu guxāma na yuexū, rü ngēxgumarūū ta Cristugagu tá namaxēxū i guxūma i duūxūgü i nüxū yaxōgūxū.

23 Natürü wüxichigü tá tūmawa nangu na wena tamaxūxū. Rū Cristu nixī ga nüxīra maxūcū. Rū ngēxguma wena núma naxūxgu i nümax, rü ngēxguma tá nixī i wena namaxēxū i ngēma duūxūgü i noxrü ixīgūxū.

24 Rū ngēmawena tá nixī i nagūxū i naāne. Rū ngēxguma tá nixī ya Cristu i nüxū naporamaēxū i guxūma i norü uwanügü. Rū ngēxguma tá nixī i



Nanatü ya Tupanana naxããxŭ i guxŭma na nüma namaã inacuáxúcèx.

<sup>25</sup> Erü nüma ya Cristu rü ãëxgacü tá nixĩ ñuxmatáta nüxŭ naporamaë i guxŭma i norü uwanügü.

<sup>26</sup> Rü ngëma nawa iyacuáxŭ i norü uwanü i tá nüxŭ naporamaëxŭ, rü yu nixĩ.

<sup>27</sup> Yerü Tupana rü marü Cristumëxëwa nanayexmagüxëë ga guxŭma. Natürü woo Tupanaärü ore nüxŭ ixuxgu na Cristumëxëwa nangëxmagüxŭ i guxŭma, natürü nümatama ya Tupana rü tama Cristumëxëwa nangëxma. Yerü nüma ga Tupana nixĩ ga Cristumëxëwa nayexmagüxëëãxŭ ga guxŭma.

<sup>28</sup> Rü ngëxguma guxŭma Cristumëxëwa ngëxmagügu, rü ñuxŭchi nümatama ya Cristu ya Tupana Nane rü tá Nanatümëxëwa nügü nangëxmaxëë. Yerü nüma ga Tupana nixĩ ga Cristumëxëwa nayexmagüxëëãxŭ ga guxŭma. Rü ngëmaãcü ya Tupana rü guxŭmaã tá inacuèx.

<sup>29</sup> Rü nangëxma i ñuxre i duŭxŭgü i petanüwa i Tupanaegagu yuexŭchicüü íbaiŭxŭ. ¿Rü tüxcüŭ ngëma naxügü? Rü ngëxguma chi tama wena namaxëgu i duŭxŭgü i yuexŭ, ¿rü tüxcüŭ ngëma yuexŭchicüü ínabaiŭ?

<sup>30</sup> ¿Rü tüxcüŭ i toma rü guxŭguma äücümaxŭwa tangëxmagü?

<sup>31</sup> Pemaã nüxŭ chixu, Pa Chaueneëgŭx, rü guxŭ i ngunexŭgu rü äücümaxŭwa changëxma, rü tama nüxŭ chacuèx i tacü rü ngunexŭgu Tupanaärü oregagu tá na chayuxŭ. Rü ngëma rü aixcümaxŭchi nixĩ, ngëxgumarüŭ na aixcüma yĩxŭ na choxŭ nangëxmaxŭ i wüxi i taãë i taxŭ i

ñuxma na tórü Cori ya Ngechuchu ya Cristuaxŭ peyaxõgüxŭ.

<sup>32</sup> Choma rü nuã Epéchiuwa rü Tupanaãrŭ orechigagu chorŭ uwanũmaã poraãcŭ togŭ tachoxŭgagŭ. Rŭ ñoma naëxŭ i idŭraexũmaã togŭ tadèixŭrŭŭ tixŭgŭ. ¿Natŭrŭ tacŭwa choxŭ namexŭ ga yema ega chorŭ maxŭ i ñoma i naãnewa choxŭ ngëxmaxŭcèxicatama yixŭgu? Rŭ ngëxguma chi aixcũma yixŭgu na tama wena namaxëxŭ i yuexŭ, rŭ marŭ name i ñatarŭgŭgŭ:

“¡Ngŭxã tachibŭe rŭ taxaxegŭ, erŭ paxa tá tayue!” ñatarŭgŭgŭ.

<sup>33</sup> ¡Natŭrŭ tãŭtãma nawe perŭxŭ i ngëma duŭxŭgŭ i ngëmaãcŭ chixri idexagŭxŭ! Erŭ aixcũma nixŭ i ngëma ore i ñaxŭ:

“Rŭ texé ya chixexŭ i duŭxũmaã ãmŭcũxe, rŭ tũxŭ inayanaxoxëë i tũmacũmagŭ i mexŭ”, ñaxŭ.

<sup>34</sup> Rŭ name nixŭ i meã pegũãëgu perŭxŭnũë rŭ nũxŭ perŭxoe i ngëma perŭ chixexŭgŭ. Rŭ wŭxi i perŭ ãne nixŭ na pemaã nũxŭ chixuxŭ rŭ ñuxre i pema rŭ tama aixcũma Cristuarŭ duŭxŭgŭ pixŭgŭxŭ rŭ tama aixcũma Tupanaxŭ pecuëxgŭxŭ.

### *Ñuxãcŭ wena namaxë i yuexŭgŭ*

<sup>35</sup> Natŭrŭ ngŭrũãchi tá texe pexna taca rŭ ñatarŭgŭ pexŭ:

“¿Ñuxãcŭ tá wena namaxëxŭ i yuexŭ? ¿Rŭ nañuxraŭxŭ i naxŭnemaã tá ínadagŭxŭ?” ñatarŭgŭ tá pexŭ.

<sup>36</sup> Pa Duŭxŭ i Ngëãëmarexŭx ¡rŭ dũcax! Rŭ ngëxguma wŭxi ya nanetũchire itoxgu, rŭ nũma ya yima naxchire rŭ nayu na ngemaãcŭ naxŭxŭcèx i ngëma nanetŭ.

37 Rū ngēma waixūmūgu itoxū, rū tama marū nanetū ixīxū nixī, natürū naxchire nixī ya yima itoxūne woo triguchire rū ēxna ngexürüxūmare i to i nanetūchire yixīgu.

38 Rū ngēxguma marū inatoxguwena, rū Tupana nixī i yanaxūxēēcū ya yima nachire na nūma nanaxwēxexūācūma yīxūcèx i ngēma nanetū.

39 Rū tama guxū i naxūnegū nawūxigu. Rū duūxēxūne rū nanatoraxū, rū naēxūgūxūne rū to nixī, rū werigūxūne rū to nixī, rū choxnigūxūne rū to nixī.

40 Rū ngēxgumarūū ta nangēxma i naxūnegū i daxūguxū i naānecūāx, rū nangēxma i naxūnegū i ñoma i naānecūāx. Rū ngēma daxūguxū i naānecūāx i naxūnegū rū nūxū nangēxma i noxrūtama mexū, rū ngēma ñoma i naānecūāx i naxūnegū rū ta nūxū nangēxma i noxrūtama mexū. Natürū tama nawūxigu i ngēma norū mewa.

41 Rū üēcūarū yauracūū rū tama namaā nawūxigu i tauemacūarū yauracūū. Rū woramacurigūarū yauracūū rū to nixī. Rū nügütanūwa ya woramacurigū, rū tama nawūxigu i norū yauracūūwa.

42 Rū ngēxgumarūū tá ta naxūpetū namaā i naxūnegū i ngēma duūxūgū i yuexū. Erū ngēma naxūne i noxri nūxū ngēxmaxū rū iyarūxoxwēxexū nixī. Natürū ngēma naxūne i tá nūxū ngēxmaxū i ngēxguma wena namaxēgu, rū ngēma rū tagutáma inayarūxo.

43 Rū ngēma naxūne i yuxū rū taxuwama name i ngēxguma inatēxgux. Natürū ngēxguma wena namaūxgu rū tá namexēchi. Rū ngēma naxūne i ñuxma turaxū rū ngēxguma wena namaūxgu rū tá

napora.

<sup>44</sup> Rū itanatèx i ngēma naxūne i ñoma i naānecūāx ixīxū. Natürü ngēxguma inadxgu, rü daxūcūāx i naxūne tá nixī. Rū ñuxma na nangēxmaxū i naxūne i ñoma i naānecūāx rü ngēmawa nüxū tacuèx na nangēxmaxū ta i naxūne i daxūcūāx.

<sup>45</sup> Tupanaārü ore i ümatüxūwa rü ñanagürü:

“Guma nüxīraücü ga yatü ga Adáü rü nüxū nayexma ga ñoma ga naānecūāx ga naxūne ga paxaāchi maxūxū”,

ñanagürü. Natürü ya Cristu rü daxūcūāx nixī. Rü nüma nixī i tüxna naxāāxū i maxū i taguma gúxū.

<sup>46</sup> Noxri rü tüxū nangēxma i ñoma i naānecūāx i taxūne. Natürü yixcama rü Tupana tá tüxna nanaxā i to i taxūne i daxūcūāx ixīxū.

<sup>47</sup> Guma nüxīraücü ga yatü ga waixūmüwa ücü, rü ñoma ga naānecūāx nixī. Natürü tórü Cori ya Cristu rü daxūguxū i naānecūāx nixī.

<sup>48</sup> Rü ngēma taxūnegü i ñoma i naānewa tüxū ngēxmaxū, rü guma Adáüxūne ga waixūmüwa ücürüü nixīgü. Natürü ngēma naxūnegü i daxūwa nüxū ngēxmaxū i duüxügü, rü Cristuxūnerüü nixīgü.

<sup>49</sup> Rü ñgexgumarüü na Adáü ga waixūmüwa ücürüü na yīxū i taxūne, rü ngēxgumarüü tá ta Cristu ya daxūwa ngēxmacürüü nixī i taxūne i yixcūra.

<sup>50</sup> Rü dücax, Pa Chaueneēgūx, pemaā nüxū chixu rü ñaā taxūne i namachinaxcèx rü naxchinèxānaxcèx, rü taxucürüwa Tupana āēxgacü íyīxūwa nangu. Erü ngēma iyarüxoxū, rü taxucürüwama Tupanaxūtawa i ngextá taxuūma íyarüxoxūwa nixücu.

51 Natürü chanaxwèxe na nüxŭ pecuáxŭ i wüxi i ore i ěxŭguxŭ ga noxri Tupanaxĩcatama nüxŭ cuáxŭ. Rŭ dücax, tãütáma guxã tayue, natürü guxãxŭne rŭ tá naxüchicüü.

52 Rŭ ngürüãchimare wüxi i peãxētügu tá nixĩ i ngẽma na naxüchicüüxŭ i taxüne i ngẽxguma naãneãrŭ guxgux naxãgagu ya corneta. Rŭ tá naxãga ya yima corneta, rŭ ngẽxguma i ngẽma duũxŭgŭ i yuexŭ rŭ tá ínarüdagŭ na tagutáma wena nayuexŭcèx. Rŭ yixema na imaxèxŭ rŭ tá naxüchicüü i taxünegü.

53 Erü ngẽma taxüne i yuxwèxexŭ rŭ woetama tama taixŭ rŭ tá naxüchicüü. Rŭ wüxi i ngexwacaxŭxŭ i naxüne i aixcŭma taixŭ rŭ tagutáma yuxŭ tá nixĩ.

54 Rŭ ngẽxguma ngẽmaãcü naxüchicüügu i taxüne i yuxwèxexŭ, rŭ tüxŭ nangẽxmagu i taxüne i ngexwacaxŭxŭ i taguma yuxŭ, rŭ ngẽxguma tá nixĩ i yanguxŭ i Tupanaãrŭ ore i ümatüxŭ i ñaxŭ:

“Marü inayarüxo na nayuexŭ i duũxŭgŭ. Rŭ Tupana rŭ marü yuxŭ narüyexera.

55 Rŭ dücax, Pa Yux, ¿ngèxŭ i curü pora i namaã toxŭ curüyexeraxŭ? ¿Rŭ ngèxŭ i ngẽma cuxne i namaã toxŭ cudèixŭ?”

ñanagürŭ i ngẽma Tupanaãrŭ ore.

56 Rŭ ngẽma naxne i yu, rŭ pecadu nixĩ. Erü ngẽma pecadu nixĩ i naporaxèèxŭ i ngẽma yu na tüxŭ nadèixŭcèx. Rŭ ngẽma mugŭ ga Moĩché ümatüxŭ nixĩ i naporaxèèxŭ i pecadu, erü woo namexgu i ngẽma mugŭ, natürü taxucürŭwama texé aixcŭma tayanguxèè.

57 Natürü name nixĩ i Tupanana moxè taxã yerü núma nanamu ga tórŭ Cori ya Ngechuchu ya Cristu

na ngēma yuxŭ tūxŭ naporamaēxēxŭcèx.

<sup>58</sup> Rŭ ngēmacèx, Pa Chaueneēgŭ ya Pexŭ Changechaŭgŭxex, rŭ name nixī i meā peyaxōgŭama rŭ taguma ípenatèx i Tupanaārŭ ore. Rŭ name nixī i guxŭguma meā penaxŭ i tórŭ Coriarŭ puracŭ, erŭ pema nŭxŭ pecuèx rŭ ngēma puracŭ i nŭxŭ pexŭxŭ, rŭ tama natŭcèxma nixī.

## 16

### *Togŭ i yaxōgŭxŭcèx inanutaque ga dīeru*

<sup>1</sup> Rŭ ñuxma tá pemaã nŭxŭ chixu i nachiga i ngēma dīeru i penutaquēxexŭ na namaã nŭxŭ perŭngŭxēēgŭxŭcèx i taeneēgŭ i yaxōgŭxŭ i Yudéaanewa ngēxmagŭxŭ. Rŭ ngēma yaxōgŭxŭ i Gárataanewa ngēxmagŭxŭ rŭ marŭ namaã nŭxŭ chixu na ngīxŭ nanutaquēxegŭxŭ i ngēma dīeru. Rŭ chanaxwèxe i pema rŭ ta ngēxgumarŭ penaxŭ.

<sup>2</sup> Rŭ ngema dīeru i perŭ puracŭwa ngixŭ peyaxucŭwa rŭ guxcŭ i yŭxŭarŭ ngunexŭgu rŭ tá ngixŭ pexã i ngēma dīeru i Tupanaarŭ ixīcŭ. Rŭ ngīmaã tá penguxŭ na tama ngēxguma ngema changuxguama ngīxŭ na pedexŭcèx.

<sup>3</sup> Rŭ ngēxguma petanŭwa changuxgu, rŭ tá chanaxumatŭ i ñuxre i poperagŭ naxcèx i taeneēgŭ i Yerucharéŭwa ngēxmagŭxŭ. Rŭ ñuxŭchi ngēma poperamaã tá Yerucharéŭwa chanamugŭ i ngēma duŭxŭgŭ i pema nŭxŭ pexunetaxŭ na ngema ngīxŭ nangegŭxŭcèx i ngēma dīeru i taeneēgŭcèx ngīxŭ penutaquēxecŭ.

<sup>4</sup> Rŭ ngēxguma chi choxŭ natauxchagu na ngema Yerucharéŭwa chaxŭxŭ, rŭ nŭmagŭ rŭ tá wŭxigu chomaã ngema naxī.

*Pauru nagu narixñü na Corĭtiuwa naxũxŭ*

<sup>5</sup> Choma rü Machedóniãñewa tá chaxüpetü na íchayadauxúcèx i taeneëgü i ngema ngëxmagüxŭ. Rü ngëmawena rü tá petanüwa changu na pexŭ íchayadauxúcèx.

<sup>6</sup> Rü ngürüãchi tá ñuxre i ngunexügü ngëxma petanügu charüxãũx, rü bexmana ngürüãchi ngema petanüwa tá chanangupetüxëë ya mucü. Rü ngëxguma rü tá pexŭ natauxcha na choxŭ perüngüxëëgüxŭ na ngëma íchaxüxchaüxüwa chaxüxúcèx.

<sup>7</sup> Erü tama chanaxwèxe i paxaãchimare pexŭ chadau. Natürü petanügu charüxãũxchaŭ i ñuxre i ngunexü ega chi norü ngúchaxŭ yixĩxgu ya tórü Cori.

<sup>8</sup> Natürü nuã Epéchiuarü ññewa tá changëxma ñuxmatáta Pëtecóstearü ngunexüwa nangu.

<sup>9</sup> Erü nuã rü tórü Cori poraãcü choxŭ nanatauxchaxëë na nüxŭ chapuracüxúcèx rü nüxŭ yaxögüãxúcèx i muxüma i duüxügü woo namu i ngëma tama naxwèxegüxŭ na nuã chapuracüxŭ.

<sup>10</sup> Rü ngëxguma chi Timutéu petanüwa nguxgu, rü chanaxwèxe i meãma penayaxu na petanüwa nataãëxúcèx. Erü nüma rü ta chauxrü tórü Coriarü puracüwa napuracü.

<sup>11</sup> Rü ngëmacèx tama chanaxwèxe i texé petanüwa nüxŭ taxoe. Natürü chanaxwèxe i nüxŭ perüngüxëë na taãëãcüma nuã naxüxŭ na choxŭ íyadauxúcèx. Erü poraãcü íchananguxëë na nuã nanguxúcèx namaã i ngëma togü i taeneëgü.

<sup>12</sup> Rü ngëma taeneë i Aporu rü poraãcü nüxŭ chacèxŭ na petanüwa íyadauxúcèx namaã i ngëma

togü i taeneēgü. Natürü tama ngema naxūxchaŭ i ñuxmax. Natürü ngēxguma naxāchicagu rü tá ngema naxū.

*Pauru nüxŭ narūmoxē ga yema yaxōgüxŭ*

<sup>13</sup> ;Rü pexuāēgü na taxuŭma i chixexŭgu peyixüçèx! ;Rü meāma peyaxōgüama woo ŭacü pexŭ üpetügu! Rü name nixī i peporaeama rü taxucèxma pemuē.

<sup>14</sup> Rü guxŭma i ngēma pexüxŭ, rü name nixī i pegü pengechaŭgüäcūma penaxü.

<sup>15</sup> Rü dücax, Pa Chaueneēgüx, pema nüxŭ pecuèx na Estéfanatanüxŭgü yīxŭ ga nüxīra yaxōgüxŭ ga Acayaanewa. Rü meāma nüxŭ pecuèxgü na ñuxācü poraäcü taeneēgü i yaxōgüxŭxŭ na nangŭxēēgüxŭ.

<sup>16</sup> Rü chanaxwèxe i naga pexīnüē i ngēma duŭxŭgü i Estéfanatanüxŭgürüŭ ixīgüxŭ. Rü ngēxgumarüŭ ta chanaxwèxe i naga pexīnüē i guxŭma i ngēma duŭxŭgü i ñaā Tanatüarü puracüwa puracüexŭ rü ngŭxēētaegüxŭ.

<sup>17-18</sup> Rü ñuxma na taxucürüwama chauxŭtawa pengēxmagüxŭ, rü wüxi ga chorü taāē nixī na núma naxīxŭ ga taeneēgü ga Estéfana rü Fortunátu rü Acáicu. Rü yema taeneēgü ga núma ŭxŭ rü pexŭ nixuchigagü rü yemaäcü choxŭ nataāēxēēgü ga yema pexŭ na nataāēxēēgüxŭrüŭ. Rü tanaxwèxe i naga pexīnüē rü nüxŭ pengechaŭ i ngēma duŭxŭgü i ngēmagürüŭ ixīgüxŭ.

<sup>19</sup> Rü guxŭma i taeneēgü i yaxōgüxŭ i Áchiaaneärü iānegüwa ngēxmagüxŭ, rü moxē pexcèx ngema namugü. Rü Aquiru rü Prisila rü guxŭma i ngēma yaxōgüxŭ i Aquirupatawa



ngutaquēxegūxū, rü moxē pexcèx ngema namugū naegagu ya tórü Cori.

<sup>20</sup> Rū guxūma i taeneēgū i nūma ngēxmagūxū rü moxē pexcèx ngema namu. Rū chanaxwèxe i wüxichigū i pema rü pegū pengechaūgūācūma pegū perūmoxēgū.

<sup>21</sup> Choma i Pauru rü choxmēxmaātama pexcèx chanaxūmatū i ñaã chorū moxē.

<sup>22</sup> Rū ngēxguma chi texé tama tórü Cori ya Ngechuchu ya Cristuxū ngechaūgu, rü Tupana tá tūxū napoxcu. Rū paxa tá ínangu ya tórü Cori.

<sup>23</sup> Rū chanaxwèxe i tórü Cori ya Ngechuchu ya Cristu poraãcū pexū narüngūxēē..

<sup>24</sup> Rū guxāma i pema, rü poraãcū pexū changechaūācūma pexū charūmoxē naegagu ya tórü Cori ya Ngechuchu ya Cristu.

Rü nuāma pexna,  
Pauru

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6